

崑崙崙旅行日記




羅剛教授遺書序

當前清光緒乙巳廣東南海縣令裴君伯謙由粵督岑制軍春煊奏參革職發往新疆永不釋回裴君自發廣州及抵迪化道途所經逐日爲記成河海崑崙錄一書迨宣統庚戌天津溫君支英由直督陳制軍夔龍奏參發往新疆嚴加管束溫君自被逮及抵戍所亦著崑崙旅行日記一書裴君文章政事著稱於時乃遇羣呼官屠戶之岑春煊獲嚴譴溫君北方之強也具一往無前之志氣抱百折不回之精神欲建掀天揭地之盛業博震古鑠今之令譽猝遭自號庸庵之陳夔龍坐罪與裴君同自溫君之大獄起一時遂有庸庵誠庸哉支英洵英矣之謠裴君謫居新疆數年於宣統庚戌奉詔釋回溫君到新疆不載值革命軍起前清遜位安然而回綜兩先生之行事志趣雖或有不同遭際則未嘗少異因憶潘次耕先生壽顧亭林先生文謂賢人君子之生於世其亨屯窮通之數類不能必之於天而獨有人焉屯而不困窮而不厄若天之留以有待者余每讀書至此輒中心

怍怍若有所感觸而不能自己越稽兩先生之身世覺天心之可見而不可測者兩先生終堅持其可必者而待之其究也人定終勝天焉蓋人無奈天何者存乎氣數而天之無奈人何者又在乎人之自爲耳河海崑崙錄刊板行世有年矣崑崙旅行日記尙秘諸篋笥茲者支翁既歿介弟佩珊市長乃將手稿檢出校定而命不才爲之序不才學淺識暗末由測支翁之高深顧何以序支翁之書哉王晉卿方伯之序河海崑崙錄曰伯謙之爲是錄也見見聞聞一切感矣觸之於心應之於手滂沛胸臆流洄唇齒儒行而道蘊莊語而諧詞妙物爲言籍外爲論其所謂參差諷譎充實而不可以已者耶晉卿方伯之序崑崙錄大略具是然則崑崙日記復何異於崑崙錄乎予更讀日記最後一節有云視察新居臥房書室各一間房屋寬敞光線充足迴廊環繞花木扶疏清渠一道小橋通焉窗對博克達山山頭終年積雪每風雨晦明雲影山光時時變幻快人胸臆可以修養可以讀書雖終老於此亦云幸矣從此閉戶埋頭讀書養氣靜以待時而已細繹支翁之所記其曠達之懷閒適之趣爲何如哉昔蘇長公有言余之無所往而不樂蓋游於物之外者也

伯謙亦云萬里之境與人同寸心之境與人異則支翁之履險如夷條然自得較量往哲同揆合符睥睨時賢如驂之靳予又何從更贊一詞哉支翁已長往矣恨不得起逝者於九原而一質之也是爲序辛巳七月商邱陳寶銘謹識於津沽廡廬之亦囂囂室



先兄支英公傳略

世珍謹述


先兄諱世霖字子英一字支英晚號鐵仙幼岐嶷初就傅讀書逾常童稍長承先母徐太夫人之訓慨然有經世之志清政不綱先兄痛國是之日非遂棄舉業投考水師電報各學堂期能學成致用而錄取之後均以末疾見擯時先兄年方弱冠以家境日落俯仰無計乃就督署道署及東征大臣文案謀升斗以供菽水泊安南等處割讓戊戌庚子之禍繼起疆宇日蹙先兄懼國亡之無日憤不欲生乃走淞滬入桂林間關萬里奔走呼號終以所如不合鬱鬱北歸因創設天津普育女子學校發刊醒俗人鏡自由等報鼓吹新政喚醒同胞華北人民思想因之一變復與王勵齋法勤孫伯蘭洪伊諸君創辦直省自治研究會總所代表爭回津浦車站又組織請願國會同志會聯合各省學生作救國運動赴京請願縮短預備立憲年限不意觸怒大吏爲直督陳夔龍奏參奉旨遣戍新疆嚴加管束先兄慷慨就道及抵戍所益自奮勵並著成崑崙崙崙旅行日記及新疆風

俗考辛亥秋武昌起義 先兄被諸同志推爲新疆都督與清兵激戰被圍兩日夜幾瀕於危幸得中央財政監理官梁君之維護始獲脫險回里共和告成 先兄任同盟會天津交通部部長及國民黨燕支部總幹事民國二年當選衆議院議員於黨政多所建白頗爲當道所側目二次革命及護法護憲諸役 先兄均僕僕奔走勞怨不辭奈以孤掌難鳴雖竭盡心力終不能以獨木而支危厦晚年家居日惟摩挲古泉貨兼習篆隸以自娛絕口不談時事蓋蒿目時艱救援無計不欲徒托空言也 先兄性豪爽涇渭分明意有不可從不輕予假借獎後進重友誼輕財仗義然諾不苟生平足跡半天下所至皆周訪其風土人情至談及國故軼聞與夫評論事理輒纏纏落落溯本追源如江河之東注其氣象之恢宏見者無不欽服 先兄生於清同治九年庚午閏十月三十日故於民國二十三年十二月二十四日享壽六十有五臨終之前夕倩友就榻前書留遺囑曰「世霖學識淺陋姿質愚拙清季以主張救國而被放民國因奔走黨政而落伍半生飄泊無補時艱興言及此慚愧何如今者病魔爲虐一息僅存自惟生性慤直覺夙昔開罪於諸

同志及戚好者幾更僕難數然私交公誼兩不相妨區區此心天日可鑒倘蒙俯予矜原感且不朽嗚呼外患方殷內憂未艾茫茫前路在我國上下人士好自爲之而已牀簣昏亂手顫舌強心有所感未容緘默爰囑友人代爲錄出並進最後之一言以當訣別


先兄畢生心力惟以救國爲務雖至易簣彌留尙耿耿於中觀遺囑數言可知其未嘗頃刻忘國是也茲以校印崑崙旅行日記緣撮 先兄事略於篇首俾讀者知 先兄之生

平云爾



先兄支英公遺像





此圖爲國會請願同志會代表紀念留影攝於清光緒三十四年戊申秋七月
 二年 先兄遂以此事遣戍新疆圖中有微鬚而中坐者爲 先兄支英公後排
 (自左至右) (一)王君法勤(三)康君甲成(五)劉君孟揚(七)烏君澤聲其
 諸君或以年貌之改觀或爲各省之同志不能一一辨識矣 世珍附識

國與法不立余憤內人廷身制漢民族日趨衰頹

糾合同志乃請願國會定憲法之運動風起雲湧

全國鄉市應任是而右那柱之統率誠矣

皆為批約革命中秘密派之開導運動大適

際中會想中風雨之省民家也

人出博於扶學界聞大會歡迎余旋被舉為

國學生會西會長通電全國學校罷課示威
動向延執政獎勵表受嘉立督陳慶純

余鼓歌學生謀身不軌後經余往新臺

嚴加管束余日以此篇之大校所難喚者

終焉務機增長學校古多惜者多其供獻於同

未免愧焉耳

支英溫世霖



遣戍新疆之始末

清宣統二年庚戌先兄支英公因代表學界同志會向政府請願迅開國會縮短預備立憲年限爲當道所嫉視直督陳夔龍迎合上意誣捏先兄罪名奏請從嚴懲辦奉上諭遣戍新疆交地方官嚴加管束先兄遂被捕遠征矣是年十二月二十六日上海時報曾揭載「直隸四次請願之大冤獄」一文對於此事言之甚詳茲編印先兄崑崙旅行日記特摘錄篇首俾讀者知先兄遣戍之始末云

支英公識

四次請願風潮起發於東省當東省赴京代表過津時報告東省一切情形于是各省留津學生到者二千餘人經代表等詳述經過學生等熱忱憤發遂發起通國學界同志會以爲東省代表後援後以學生等年輕識淺閱歷無多深恐偏於激烈於事終無所補遂公推天津紳士溫世霖爲會長因溫聲望素著名譽夙隆曾充第三次請願代表閱歷甚深且素於公益之事每不惜捐棄生命財產以爲之故公推溫爲會長時學生皆鼓掌歡

呼以表歡迎溫君力辭不獲後數日有法政學校學生江君元吉孫君可及北洋師範學校學生方君等先後割股刺臂斷指以堅衆志而學生等遂大發狂熱謂以人之血肉尙不顧惜我等何於數日之光陰尙不肯犧牲遂公議停課齊赴督院懇請代奏惟溫對於此舉極不贊成謂陳督尙在病假此舉恐無效不如另籌進行方法且學生請求國會雖發於忠愛之忱然亦有違學生不准干預政事之諭旨如再停課要求代奏不徒有害學業且恐授官府以口實反覆陳說此等舉動之不可無如學生等熱度太高皆不贊成次日天尙未明學生已齊集廣東會館至者約三千餘人往督署時列隊進行整齊嚴肅不意行至公園突來馬車一輛係禁烟局總辦袁靜菴之車也馬夫揚鞭而馳馬走如飛直衝學生隊伍學生躲避不及有被馬車碰傷者學生乃大動公憤打破馬車袁見勢不佳抱頭鼠竄而去既至督署學生皆席地而坐僅會長溫君及商會總理王竹林諮議局議員等將稟遞上陳督見勢盛毫無主張允爲代奏學生始歸校靜候其時天津交涉司及天津鎮張懷芝等均慫恿陳督日學生爲學匪謂若聽學生如此胡鬧將來督撫威信掃

地於是有主張綑縛會長溫君者有主張鎗殺學生者陳督素極昏庸聞言大怒遂飭巡警道舒鴻貽拿辦舒恐釀出非常事變未敢操切陳督嚴加申飭謂舒有同聾瞶等語後接上諭仍以不可再行縮短數字了之陳督見上諭不准遂張貼告示禁止再行要求如再要求即行拿辦其尤可笑者則謂開國會譬如請客必先杯盤酒食備齊客至即可饗客否者恐客來主人無以應客其思想之鄙陋立言之庸俗有如此者學生熱度未少減仍齊集直隸自治研究所籌議進行方法陳督又飭巡警道嚴拿舒仍主張和平解散陳督乃命天津鎮張懷芝帶馬隊數百名赴所屬其嚴行捕殺又命巡警道派警兵數十均帶鎗械各衙署亦紛紛要求保護滿街馬隊巡邏如臨大敵學生愈行激昂巡警道派員到所痛哭流涕婉曲開導爲學生演說學生始散及張懷芝乘馬車趕至聞已解散其捕殺學生之心未遂甚爲敗興頓足而返未幾二十三日之上諭又下諭民政部及步軍統領衙門迅速將東省代表送回原籍並謂各省如再有聚衆滋鬧等事即飭地方官查拿嚴辦等語學生見此上諭遂遵旨解散同志會照常上課者有之紛紛回籍者有之數日

間學生已散大半溫君自同志會解散後因日疾家居陳督見政府此等舉動窺測朝廷
意旨完全借立憲之名行專制之實而對待國會代表之心理則主張嚴辦知非先擒首
要不足以得政府之歡心非嚴防學生不足以顯其鬼馘之手段乃一面令巡警道派遣
警兵往各校晝夜巡邏嚴防學生出入此校學生往彼校者警兵輒隨其後聽其所談者
何言如防匪寇一方面密札探訪局總辦巡警道及提學使三人各處調查溫之過失未
得遂志探訪局總辦楊以德曾與溫有私仇亦欲藉此陷溫因佈散黨羽費千餘元以訪
溫之劣跡又不能得乃謂溫曾充長隨組織同志會電各省同時罷課意在擾害治安遂
其煽動之私陳督大加賞識遂飭巡警道拿溫到案此十二月初七日晚間事也溫被拘
後直隸紳民大爲憤懣遂會議往督院質問陳督答已經電奏須候旨意施行及電旨下
將溫發往新疆交地方官嚴加管束當即起解此初九日下午事也（下畧）

崑崙旅行日記

天津溫世霖支英甫原稿

弟 世珍佩珊甫校訂

宣統二年庚戌十二月初七日（公歷一九一一年一月七日）

晚七時餘在廡中正設晚餐突有警官二三人闖入內室聲言巡警道傳喚有話說時予適病右目幾欲失明疼痛甚劇力疾隨往擬命兒子祖蔭扶掖以行警察不准其勢洶洶如獲巨盜予不得已蹣跚摸索隨至本管警察五分局一區卽由警局巡官率同警士押予赴道署當有司法科長余君及行政科長桂君面告係奉大帥密札交辦不知細情予要求兩君轉求道憲到院請示罪名當被拘留道署遣蔭兒回家十時余桂兩科長復來云道憲已回署大帥因讌客未見據巡捕云係被人控告明早道憲當再上院請示詳情

初八日 日疾漸好內子派蔭兒送到藥水藕茶洋點心等物請余科長數次均支吾未

至直至晚八時始出見云道憲已謁大帥奉諭一半日請到院面談並無他語余揣其語氣似有陳督親訊之意姑聽之

初九日 早蔭兒送藥水至云各界同人開會上稟督院責問擅加逮捕理由午後內子又派蔭兒送小棉襖來稍坐卽歸下午三時余科長來閒談忽行行政科朱科員偕警察北局許局員來云頃道憲自督院來電話請溫君卽刻搭車赴京因肅親王來電有話面問一見卽可回來予懸揣陳督陰謀已成徒爭口舌無益也且恐肝氣上冲反於目疾有礙因慨然就道押解者卽許局員帶同警士十人晚宿豐台第一客棧夜間函囑內子卽率蔭兒携舖蓋藥水來京訪孫君伯蘭到外城廳探聽消息夜間前代理天津縣周子蔭大令奉派續到豐台押解

初十日 晨起余請許周兩解委正式宣布解文兩君言語支吾余再四詢詰始實言住豐台不走者卽守候咨文此次奉差係面諭未見札文故行李均未及帶午間內子偕蔭兒同襄臣內兄瑞庭內弟到始知此次係被陳督參辦奉旨遣戍新疆遂與妻

子略談家務及學堂事約半時餘即登車遠征矣經路保定聞車站聚集學生二千餘人欲劫余回津解委因不准停車直赴枕頭（卽石家莊）宿焉夜深作函致內子將經手事詳列十條託解委周子蔭大令帶回天津

十一日 早晨被煤氣所熏暈而復甦解委許君尤甚故延至午後一時始登車晚宿河南彰德府官驛聞銅雀臺即在彰河附近磁州境內惜以匆匆就道不獲一遊爲憾終日頭暈不思飲食蓋煤氣尙未退淨也晚間稍好勉作家書一寄內子一寄南京五哥九弟又致嚴範孫閣瑞廷王竹林王劭廉李子久諸君公函爲立憲應從速籌備等事

十二日 晨六時登車南行河南解委二人一爲李君筱岩奉天人勸業道課員人甚慷慨一爲李君桂卿曾在江督張安帥幕次與九弟同寅故照料格外周到令人感激九時左右至淇縣朝即古歌城上有殷比干摘心台土阜巍然望而生敬又行十餘里鐵道傍有比干墓墓碑傳爲孔子所書尙完好墓與廟均齊整樹木葱蔚過衛輝府南

望有前明魯王墓年久失修殘破已甚而對面魯王妃墓則樹木葱蘢整齊完好據聞魯王失德人民深惡墳墓無人過問王妃則頗賢明人民頌德以故四時祭掃爲人君上者可以鑑諸城內有魯王所修望京樓亦已殘破但存古蹟而已過黃河橋橋計一百零二孔每孔約長十丈共長約六里半有餘時值冬令河水已冰故未見黃流又過蟒山黑洞燃燭無光十二時餘至鄭州小駐換汴洛車行沿途添委兵士護送晚宿洛陽城內官驛一路山隈多人民穴居猶有太古遺風聞洛陽東門外二十餘里有瓦崗寨舊址寨門尙存城東南有香山即三皇姑出家處龍門亦在香山左近惜不克逗留未能縱覽洛陽氣候甚暖雖在嚴冬猶生青草聞西行則漸寒矣

附錄鹽務張桂生君寄子宗良函

宗良吾兒知悉初九日寄函諒已收到初十日吾因公事進署州尊面前談昨接寶中丞電言直督來電今天北車有要犯溫世霖過境派委妥員押解洛陽等語不知是何案情吾分手後到車站適本州豫正營早到站台相候少頃彰德來電稱差事

改明日來轉日吾復來車站溫公果于早車到鄭由委員官兵等接下見其身穿元青縐綢皮長袖頭韋公喜帽入二等客座即脫帽露光頂並無刑具十分優待直隸派長隨委員一人豫撫派二位知府迎接出河南境時州尊又派委員一人解到洛陽官兵差不計其數州委係龔少山同吾相好差未到時少山言與溫公有無話說可爲代達吾言相識而已無甚交情然關我同鄉之誼務求格外關照少山慨然承許並云必將此意面達溫公云云遂分手按吾國此次對待犯人這等優異爲從來所未有當溫公到時州署預備早飯如接過路委員局面飯後手巾把漱口盃茶點瓜子居然客坐毫無苦况押解委員談笑自若欽犯過境向雖如此未有如此次之優者溫公今番到鄭吾止未與談話而看得清清楚楚約一時許汽笛一聲向西去矣此段光景見我同鄉可通知一聲以免惦念吾依然平安此間壹是如恒銷路仍舊有暢無滯家內并孩子們必亦安好前托朱公捎去山藥等物已否收到稟未叙及餘無可囑此諭 父桂生手諭十二月十三日午刻

珍按 張君函中云十一日過鄭日記則十二日過鄭當以日記爲準

十三日 晨六時半由洛陽起早乘二套車甚穩午至磁澗鎮四十里早尖二時動身下午四時半至新安縣宿焉縣城騎兩山坡築成街道整齊東門外有函谷關遺址關門界石僅存半截

十四日 早六時起身行三十里過鐵門關踰一大嶺約二十里至義昌驛早尖路經山村見一家門上釘一二尺許草人中心貫一木刀詢之車夫蓋汴省之風凡失盜者如此民智如此閉塞尙何自治可言午後行山溝土嶺甚多石徑崎嶇顛頓甚苦約四十里至澗池縣宿驛舍

珍按 先兄自傳載十四日過開封河南諮議局議員及全體學生咸集車站欲設法挽留不使動身余當衆演說謂此係朝廷旨意諸君既相愛如此當使我無背朝旨否則適以重吾之罪也衆聞之有泣下者不得已共捐資八百餘元爲沿途之開銷云此節日記未載因補錄之

十五日 黎明由澠池縣動身行四十五里至陝州交界牌再半里許經東麒麟村山坡
上有古槐一株錯節盤根濃陰四覆即停車與二解委由衛兵扶掖上坡觀覽即令
衛兵數人合圍之計中節六圍又二尺餘根約十圍以外據土人云唐尉遲公勒馬
回頭看古槐即此樹也在唐時已稱古槐不知幾千年物矣當誠鄉老善爲護持不
可釘釘燒香戕害其生又行約五里至觀音堂尖該處有紅白兩色土其質甚堅燒
成器皿稍遜於磁惜無人注意及之午後起行才數十武即上峽石嶺嶺上有梨花
關（俗稱樊梨花城）嶺上下均二十五里又過一小嶺至廟溝旅店宿焉因離陝州甚遠故無官驛
一路調查風俗連載者皆以騾馬駱駝負之三四套之馬車亦不少尤以牛車爲最
多車之製與直省不同以二牛抬一棍其車只一大轆木直通車尾如丁字形全部
重量壓於牛頂俗云二牛抬橫此之謂也陝州境內有三牛駕車者前一後二於轆
木頭上加套一牛以鐵練繫之該處墳塋堆成土邱者甚少多葬于窰崗內惟有功
名者墓上立一石碑爲識耳出產以土磁絲麻棉花爲大宗

十六日 黎明由廟溝起程微風稍寒行四十里午十一時至磁鐘尖路經行宮係壬寅年兩宮回鑿時所建飯後開車風忽大作黃土蔽天羶風刺腦苦不可言而是日所乘之車只破布單圍無門帘風吹刺面不得已脫小棉襖遮蔽車門真可謂囚車矣山路崎嶇溝徑逼窄有僅行一車無車夫容足地者一路山溝以新安陝州爲最難走所幸仰承天佑未降大雪聞雪後封溝常積三四尺厚非守候經月或二十日待雪融化淨盡不能行走交通之不便行路之艱難良可慨歎三二年後潼汴鐵路如能修成即可免此苦痛矣下午三時至陝州該處以教練所爲驛館宿焉陝州爲直隸州同城有河陝汝道有工藝局出品甚多余購染羊皮套褲兩雙

十七日 晨六時半由陝州起程天氣陰霧行四十里至曲沃鎮早尖該處無旅店民居皆草屋異常簡陋吾等即坐臨街之草棚下進食面對山莊別饒風趣食品除麪條燒餅外無他物雖雞卵亦不可得真可謂之窮鄉矣飯後同解委李桂卿總戎陝委趙煥章二尹參觀行宮門窗尙完好惟墻垣間有倒塌耳午後三時復行二十里至

靈寶縣南關官驛宿焉連日行路辛苦爲風寒所襲精神委頓病日復痛因擬方服樂並購洗眼藥薰洗病日縣署送酒席來余僅留清淡者數品餘悉撤賞差弁飯後即休息

當晚餐時院中忽大譁停餐細聽聞解委李桂卿君大聲云你們老爺對溫大人得罪的起嗎他在北京罵了慶王爺連攝政王都怕他你們老爺是不想做官了余聽之大爲詫異自思縣官並未開罪于我李解委因何震怒殊難索解久之寂然晚飯後解委李曉岩來閑談因探詢頃間事曉岩兄云彼此大同鄉不妨實告頃間之事謂之喫差使藉老兄以詐縣官耳刻縣署已差轎來請桂卿兄去矣倘縣官畏事不免懇託桂卿兄從中維持結果必須多送程儀或百金或八十金爲謝余當詢問供應例規曉岩兄答以此係特別差使照例文武委員各燕席一席差費各二十兩隨封二兩戈什二人上席一席差費各四兩衛隊水席二席差費各一兩府道委員另外供給煤炭烟茶車輛儘量預備如此花銷已不在少然尙有需索桂卿兄爲大帥

衙門之巡捕縣官亦不敢得罪也言之極爲慨歎並再三屬余多多留意遂去深夜解委李桂卿始歸至余房中交來白銀二兩四錢洋燭一包茶葉一包約重二兩云係縣官所送予堅辭未收並告以以後不要說我鬧脾氣于名譽有碍桂卿笑云他們太不拏我們當差使了故此鬧他幾句此後請放心後聞比時桂卿在館驛一怒之後縣官卽將桂卿請去請教如何通知下站預備供應及增加差費等等經此一鬧大告成功而下站地方官亦卽按照上站溜單辦理以爲關照官場弄手段可謂神妙無窮門外漢焉能窺其蘊奧哉然吏治如此焉得不亡

珍按 此節原稿業已刪去因有關清末吏治且已時異境遷無所關碍故仍錄之

十八日 晨六時由靈寶縣起程出函谷關（據土人云卽秦之函谷關）四十餘里至達子營均行於山溝中兩旁高山壁立數十丈中間小溝僅容一車中途有一邊高山一邊黃河者山邊小道亦甫容車行而河岸陡削異常危險怒濤砰湃俯視目眩

數株無一隣舍後牆逼近黃河岸河面寬約數十丈波濤汹涌聞聲心悸該縣北門已被水刷入河中歸廟作家書晚購燭不得因去市塵太遠遂寢于廟之後樓窗外即黃河濤聲震耳徹夜不眠目疾復發途中風景不得盡覽恨恨

十九日 夜二時餘即由閩鄉縣起程行四十里

里大據車夫云實有六十里

至文德鎮早尖一路只行

兩山谷每山谷約二十餘里路逼窄祇容一車入谷之前須先派馬勇至前途谷口阻止進車否則中途兩車相遇必有一車倒退讓路動輒倒行十餘里

路窄不能廻旋

又行

二十餘里過第一關再里許至潼關宿五省行臺（即大公館）關城依山面河頗據形勝潼關西城樓彷彿北京之前門樓共四層較諸前門猶多一層可見古建築之

偉大黃河水不甚深中多淤沙色不甚黃水流由山口噴出關內風景與關外不同

雖僅隔一城判然有霄壤之別潼關廳劉及時司馬（昌平人）來拜餽程儀十金相待甚優鄉誼至重見予病目堅請搬入公署並懇商各解委挽留數日療治目疾因署內有西席某君精岐黃可以診治解委因係欽犯不敢擅主予亦不欲久留因

辭謝厚誼未往陝西解委奉令來迎河南解委亦奉電令召回陝西文委爲松君龍臣湖北駐防旗武委爲魏君子生汴委當爲余介紹兩省解委並互相交替晚後發內子函明信片又致五哥九弟一函托解委李桂卿河廳轉南京又致內子一函托解委趙煥章二尹轉寄天津

趙君北倉人在陝西候補有鄉誼

目痛甚沿途風景不能遍覽恨甚

河南省差徭甚重予沿途調查親身經歷始知所有過往差事名爲由地方官供應實則徵收民間物品車輛并有折價中飽者橫征暴斂民不聊生河南非本省銅元不用外省者概名之曰假銅元銀元亦有區別惜匆匆未克詳查耳

二十日 早七時興與汴委二李君話別彼此依依握手黯然令人增感九時坐尖由潼關起程行三十五里至華山廟止宿一出潼關路途平坦兩旁垂楊夾道路寬約有十丈俗所謂陽關大道者是也左文襄西征時重修此路每柳二株間楊樹一株頗齊整觀之精神一暢予等至廟由道人招待入東偏小院有北房三間西房二間地極幽靜室中陳設雅潔簾帳被褥均新製極華麗案頭置新小說數種見之深爲詫

異此等閉塞地方有此新書直可謂之奇寶矣歡喜無量稍憇進茗點燕菜一甌佐以糖餅極其適口招待周至令人欣感縣尊差片請安並云路遠不獲親來招待再三致歉縣令四川籍人極開通思想新穎頗著政聲

惜忘其姓字 聞解委松君云縣署只派一帳房師爺在此招待據云縣尊有弟二人皆在日本留學適寒假回國聞予道經此間極欲一面以恐招物議而罷其招待特別優異者非無故也茶罷同兩委參謁三清殿由道人引導縱覽古蹟據道人云昔年回民叛亂廟宇被焚至同治年間始行修復山門三門並列如宮門圍牆如城垣有雉堞周三里有餘大殿前石橋三座甚莊嚴殿上漢唐殘碑各一通院心秦柏一株護以磚牆有臬司告示不准攀折前院西偏有古柏一株已死道人云老子出函谷關曾繫青牛於此樹道人又持碑拓數種秦柏葉一束（長寸餘其細如絲束以紅絨）爲贈報以銀餅二枚少華山距此四十餘里在華州界亦華山之一脈也因在河南陝州寫家信勞神觸發肝氣目疾復作右目又不見物心緒不寧終夜不能安睡

陝西省差徭亦重如余以欽犯過境地方官辦差向里民局索大錢二三百串不等而其所供應者不過八八酒筵一二席車三四輛差費三五金而已統計不過二三十串足矣而地方官向里民局索大錢二三百串不等聞華州一處里民局年交官差萬餘串苛斂如此民何以堪

二十一日 因夜間日痛失眠早起稍晏早尖後由華陰廟起行一出廟門迎面琉璃瓦照壁金碧輝煌光彩耀目舉頭見華山最高峯形如手掌遍山積雪相去約四五里據土人云高約十餘里山麓村莊廟宇鱗次櫛比山北平原沃野一望無際遠望儼若畫圖令人心目舒暢農家多種麥竹行三里至華陰縣城郭整齊城東南角建一亭面對華山登臨遠眺饒有興趣入東門聖廟在焉再前即縣署城內僅小街一條西半城由南至北則荷塘一片直抵城根無一人家該縣直可謂之荷花城想七八月間翠蓋紅裳香風四溢其景物之清幽當不減西子湖也思之神往該縣精華皆在華山廟路經數堡儼如小城土圍土堦四門以石爲之堡內街道齊整堡門外白

叟黃童負暄嬉戲紅衣綠襖氣象熙熙其風俗頗與北直相似行三十里至敷水午尖渡河過大石橋又經一堡堡內長街一道約里許貿易者肩摹轂擊往來如織是日蓋集期也又以新年已近故貿易較勝于平日惟陳售物品只菜蔬數種及香紙爆竹而已足見生活簡單民風質樸四十里至華州宿于官驛驛舍修整距縣衙數武城內人家僅數十戶繁盛處在老城之四關外此一帶人民生計甚好較諸關內河陝兩府優裕多矣

郭汾陽祠堂及墓寇萊公墓均在州城數里外

二十二日 徹夜大風天明始息晨八時由華州起程行二十五里至赤水早尖飯後又

行二十五里過渭水河面寬約三里許以大渡船擺渡過河河岸如土阜

因距城甚近故河防堅固

下坡進一關門即渭南縣縣城遂止宿連日因眼痛整日閉目養息今日偶一開目

注視見車前有馬隊六名均着鵝黃色半臂

此舊時練軍服制尙有精神

步隊四人係潼關協台所

派營兵着黃布馬褂中有白光書一兵字則腐象不堪

此等服制爲將來博物院中不可少之陳列品距渭城三

十里即涇渭二水交會之點合流至潼關併入黃河

二十三日 日甫出即由渭南縣起程道經該縣西關貿易頗盛警察亦整齊行四十里

至靈口尖路過鴻門坡即劉項鴻門讌會之處又行三十里至臨潼山（即黎山）

山凹有秦始皇遺塚土邱甚高大枕山帶河方圓百二十餘畝臨潼山峙于後渭水

亘于前遙望儼如白帶一條又有遠山起伏如影壁即不知堪輿者見之亦知爲佳

地也據土人云塚內有宮殿殿前有水銀河人不能近又有伏機觸之即死此雖出

諸鄉里之談想當然耳然奸雄作事詭詐莫測此種舉動或竟有之未敢謂爲盡屬

理想也又行十里下午四時至臨潼縣穿城至南關外臨潼山南麓迎賓館宿焉

此處即壬寅年光緒帝回鑾之行宮 館內有湯泉三四處泉之源在山坡高處有貴妃塘據云即楊貴妃

當日賜浴處僅一小室室內一小池約二尺寬五尺長慈禧后回鑾曾浴于此四面

坐石光潤塘在迎賓館北大廳之東北大廳爲古華清池廳之西爲太師塘又有小

池二爲普通人公共之浴所男女雜浴不禁池北爲環園枕山帶河頗具邱壑其

構造之精不殊江南園林之景象園中有碑記細繹碑文知爲會稽沈家楨知該縣時所築歷任修葺添補以故林木幽邃兩宮回鑿又在池之東修造行宮山上古跡甚多池北有曲廊直達山巔上有廟宇每年三四月間爲廟會之期香客甚盛池中多小魚往來游泳雖時值隆冬而滿地青草四圍綠竹蓄以湯泉有硫磺質熱度薰蒸所致余因目疾初愈未敢縱覽風景僅在宿舍南廳左右徙倚遊矚而已晚七時

縣尊張瑞璣君

字衡玉
山西人

來拜暢談頗久此老言語爽直精神奕奕無絲毫官吏習氣

與余一見如故論及時局自云昔曾加入戊戌政黨嗣因康梁失敗譚嗣同楊源秀

等六君子遇害曾親赴菜市口收斂楊御史之遺骸並謁卹楊之遺孤

張與楊旣爲會試
同年又有鄉誼

言次憤慨萬狀拍案大呼非大革命不可者再此老有骨氣有肝胆且有國家思想

風塵俗吏中而有此人誠鐵中錚錚庸中佼佼者矣令人肅然起敬隨即入席陪同晚餐酬酢甚歡席間張公又云余不得已就一微官初謂百里侯亦可爲民造福不意到任後適得其反困守樊籠自由不得閤衙門書吏差役上下數百人即數百家

人口仰給于此數百人之薪資而此數百人所得之薪資無一文非擾民害民而來除衙前一對石獅子無須養活不擾害百姓耳此真一針見血之言非有胸襟肝膽學識不能說出也又云曾任西女首縣深知甘肅回民首領之潛勢力極大如金積堡之馬某河州之馬元璋張家川之馬某爲回王馬金隆之孫皆擁衆數十萬雖閨中少女亦習練叉子槍以一鐵叉架于馬鞍上架設洋鎗射擊左右上下無不如意再三叮囑留意訪查又以西去漸寒特餽贈十二金屬路過省城時購一皮斗篷以禦寒冷此老情誼真摯令人銘感不忘飯罷再三珍重而別十時與解委松龍臣魏子生二君同至華清池沐浴（此池即湯泉各池之發源）日疾初愈視物尙不真切又在夜晚幸承魏君扶掖下池不致傾跌石級三層已達池底池水澄清可以見底予雖病目而足趾石痕歷歷可覩水熱如湯屋頂修一圓洞洞外雖有門窗嚴閉而風從隙入寒氣刺骨縮身水中藉避寒風余氣血凝滯已久經此一浴血輪舒展精神暢爽目亦大愈夜間安睡直達天明

二十四日 早餐後參觀太師塘塘在大廳之西首時廳上有日本人三男一女借席詢知爲三原縣女學校之教員因寒假至湯泉休養聞三原有女學生出洋留學者足見該處文化之盛開通之早令人欣慕太師塘規模宏敞想見楊國忠當日之烜赫一時因連想及于楊玉環當時之驕寵淫威禍國深爲慨嘆遊覽既畢時已近巳卽登車行仍進南門經縣署差片與張縣尊道謝辭行繞至西門見武廟有小學一處警察亦整齊有精神行三十里經灞橋橋之兩端皆市街因停車午尖灞橋計八九十洞長約半里有餘工程浩大河尙未冰中多淤沙詢諸魏君云橋之歲修按陝西各州縣攤派欸項年有定額故橋能經久不壞尖後又行十里至漣河過漣橋亦石建橋不甚長兩端有石牌坊橋西即十里堡堡僅一大土阜中開一路經過時塵土被天二時至西安爲陝西省會先進外廓行甚久始望見城之東門名長樂門城樓建築式樣畧同北京惟帽樓祇六空且較小於京城東門外街市繁盛入東門爲滿兵駐防營之區氣象衰颯街市亦極蕭條警察委靡不振不如外縣多矣經鐘鼓樓商場

盛旺街市喧闐又轉兩街至馬芳門慶隆客店卸裝由長安西寧兩縣預備供應余等寓居該店之後院上房三間設備甚好晚間同鄉郭君瑞甫蠡縣人來訪云曾接天津齊彙齋段子鈞諸君來函囑托關照連日各處詢訪今始接到談次並悉直隸諮議局閣議長鳳閣及王君勵齋法勤亦電致陝西諮議局請托隨事照拂同鄉諸君子關注殷勤令人增感郭君係北洋大學畢業現充陝西高等學堂英文教習人極沈毅有肝胆少頃解委松君來托代拍安家電報告安抵陝省並稟老母安詢諸弟狀況是日疲乏已極未至九時即寢

二十五日 因昨日疲勞起時較晏盥漱後同鄉段卜臣君蠡縣人來訪（現充高等學堂

德文教習）云接到六弟子鈞來函特屬照應訪問業已數日昨晚聞郭君瑞甫云得知大駕已到故清晨即來拜訪情誼極殷午間同鄉三順合京貨舖送來各種應用物品即托該舖代為購辦皮斗篷皮褥等件飯後解委松龍臣君來述錫臬台不允拍電松君當為力剖係安家電報並無一語涉及政治在法律上似無不准之理

松君係法政學堂畢業又爲旗籍故敢于說話惟錫臬台上諭有不准打電通信字樣如必欲拍電則須經恩藝帥核示予不敢擅主松君隨即上院請示恩藝帥道乏未見松君不得已怏怏而返旂籍大員知識淺陋行爲乖謬言之太息晚飯後同鄉段卜臣郭瑞甫二君偕一河間府同鄉朱君仔鐘來訪朱君少年英俊現充陸軍學堂教習縱談鄉誼與國事甚久十時始散余亦就寢

段郭朱三君縱談國是並論及革命秘密組織擬以郭君爲中堅郭君云高等學堂有學生二百數十人已有三分之一之同志朱君云陸軍學生貴服從將來起義時新軍方面由馬隊隊長張月波君負責聯絡與陝籍軍人共同起義余建議事前應多聯絡本省紳學兩界人材並介紹臨潼縣令張瑞璣君其道德學問政治經濟均極豐富又陝西諮議局郭副局長亦有骨氣皆可爲忠實同志將來堪勝大任郭君力勸余省煩惱靜養息恐肝氣上冲有碍日疾途中無良醫良藥設致殘疾則影響前途不淺波折困難爲革命過程中應有之事當堅忍處之刻派

人到書肆覓購陝西整屋縣明末大儒李二曲先生全集以備途中消遣藉解煩悶郭君愛護之深無微不至令人感激郭君又云陝西秘密進行至爲迅速半年之後必有成效可觀大約大駕行抵新疆即可返轡余聞之欣喜非常翌年十月間義旗果舉響應武昌張瑞璣君亦被推舉爲陝西財政廳長力勸當局勿多殺戮以感化陝人陝西之政治財政能不紊亂多此老之力也

珍按 此節係以後補入

二十六日 晨起微寒天有雪意早點後旅店門前小立藉觀風土人情諮議局常駐議

員王君銘丹

字敬如

井君岳秀

字緒生

來訪談甚歡洽王君敬如爲請願同志會幹事長余

力勸中諮議局建議趕緊修築西潼鐵路便利交通開發實業以裕西北財源王井二議員云陝省富戶極少只有一家老孀婦最殷實家資亦不過八十餘萬兩而已

本省延長石油油苗甚富惜無力經營尙有石棉石城二礦亦無人開採

將石碾碎即成爲棉織布

可以避火亦罕見之奇物也

當告以由諮議局設法推廣各大埠皆可設分銷處招人承銷可得

保證金及押款如此則何患無力舉辦且可到京津滬各處招股擴充立時即可發達王井二議員深韙予言極願提案實行午間解委魏子生君來同進午餐飯後小睡片刻解委松君龍臣介紹湖北黃縣張君引五來談甚洽諮議局常駐議員蒙君儒香字蘭亭來訪自云曾任廣東縣令頗有官習晚間解委松君送來迎春四盆室中驟添生意又介西甯縣典史余遜之少尉江西人江蘇金匱朱君興餘丹徒俞君次如來談又郭君瑞甫段君卜臣偕蠡縣同鄉張君紹緒來談甚快當托郭段二君代發天津嚴範孫侍郎轉交桐君妻電一通又托三順合代購應用物件所帶銀元銅元陝垣均不用通行者仍爲碎銀與制錢及秦豐官錢局鈔票銀元折色吃虧太大金融如此閉塞其餘可知矣夜作家書

二十七日 早起稍晏閱時計已十鐘矣至同寓同鄉之京貨店閒叙鄉情午間解委松龍臣君來云西甯縣稟報臬台以此間來賓太多須設門崗禁止賓客並催促速即起行余以目疾初愈不願生此閒氣擬立即上路松君謂路費尙未領出焉能即行

請余稍爲忍耐處此蠻橫貪污勢力之下亦只有忍氣吞聲而已下午同鄉段君卜

臣派其幼弟送來點心路菜門崗軍警力阻紛爭不已余聞聲出始得讓入領受所

贈食物後略談而去思之可氣可笑發寄津友王劭廉君一函附家信 汴委李桂卿

君一函附致佩珊九弟信 晚間肝氣大作解委松君來談甚久去後余即赴同廡京貨店劉

德泉君處閒話告以海外貿易之利益至夜十一時始歸寢肝氣脇痛久不成寐又

夢與桐君妻同侍老母在廣東會館觀劇又似在津紳楊心裁老先生宅中楊心老爲津紳中最

有肝膽者 忽見普育女校師範生梅貽環張文嫻二生帶引同學四五十人到場觀劇接

談者只梅張二生與言牛忠芸耳一夜夢境迷離醒後殊爲悶悶

二十八日 早九時半起天落霰惟不久即被風吹散陝省民食多種春秋二麥今冬臘

已盡尙無一場大雪民甚憂之盥洗後即至旅店門前觀察風俗該處民風雖錮然

交通漸便及新文化之傳染亦逐漸改革惟街頭諺語有「雖然餓着呢我可坐着

呢」以逸居自豪傲睨羣衆以故民性懶惰不知進取蓋遺傳如此可慨也街市兩

面樓房甚整齊然皆古式其建築似樓非樓上層甚低住人者少多作儲藏物件之用上下用活梯下層則低黑矮小加以門前兩搭屋中尤爲黑暗光線全無人民日居暗室不知改良可見其惰歸室靜坐忽聞店外喧譁大作漸近腰廳只聞崗兵云溫大人不在家不能進去竭力阻止來賓不聽爭持甚久余不能耐出視爲諮議局常駐議員王君敬如井君崧生來訪當即迎入王井二君怒極大罵不已兩君餽送路菜多品予只領薰鴨醬肉其餘因不便攜帶璧謝二君並云郭副議長因年關回家不及招待屬爲致意略談始去同鄉郭君瑞甫來贈李二曲集一部小說數種湖北張君引五介紹段君顯周湖北黃岡人略談即去下午王井二議員又來訪贈送川資三封一諮議局一正副議長一同志會窮途遇此惟有銘心謹領耳二君又出示北京同志會孫伯蘭君及諸同志函托爲關照招待讀之增感王君敬如又贈麗澤雜誌九本同志會規約聲鐸公社簡章王君爲人有骨氣望之藹然有儒者風度令人敬佩自云到各縣演講曾被押兩次人民頗受感化設立宣講所閱報社十餘處王

井二議員坐談甚久情意殷殷再三諄屬前途珍重始握手告別松解委來云上憲嚴催上道正談間西甯縣培令來催促起行松委云速備車來立即動身培令見無可再說轉婉詢起行日期松解委大發牢騷謂大年底誰家無事欠人賬目固須稍事清理昨晚臬憲方將旅費發下亦須略事摒擋正月初五以前街市不開食物無處購買更須預備各大憲似不能不講人情培令勸住於城外即可稟報起程則公私兩便松解委又不敢擔此責任予主張初二動身多帶饅首路菜即可充饑遂定議培令方去晚飯後赴同廡德珍齋古玩莊劉德泉君鄭州人之歡送會在座者有賈子鶴君武清縣人前門外取燈胡同源成首飾樓在陝慶陞店收古玩外莊孟沛然君棗強人北京慶記古玩莊住陝垣馬芳門東來棧爲老友于澤遠之令親賀湘南之高弟何建臣君蔣潤田君皆北京晉寶齋古玩莊住陝外櫃廡興盛店衆同鄉歡聚一堂異常快樂縱談鄉情及自治事至十二時始散會歸寢公送程儀十金情誼殷拳不能不領

二十九日 是月小建即除夕晨起大雪早餐後發天津安瑞廷內弟一函

附家書

賀湘南

老弟一函午後同鄉孟沛然送橘柚一筐同鄉段卜臣同陝紳高等學堂監學王君

味齋湖南董君雨農諸君來談甚久極其歡洽又同鄉朱君仔鐘同高陽韓君慕蘄

字德忠

清苑趙君士棟

字煥

來談甚快並贈送鮑魚茶葉等物掌燈後忽聞院中紛呶

大呼打打急出視見一軍官率數馬弁立院中軍官手執馬鞭鞭打崗兵一面打一

面責問你還說溫大人不在家余忍俊不禁勸讓入室軍官猶忿忿自云我係獻縣

張月波現充陝西二標一營管帶特來拜候並餽程儀五金又代砲隊管帶河間同

鄉馮家俊

字越千

餽川資三金並云許多同鄉要來望看因年關不得分身今聞郭瑞

甫鄉兄告知大駕明後日即須動身故公推月波代表送行不及公餞殊爲抱歉張

君官印國溶人極爽直不失燕趙風度稍談即去晚間松解委送到黃河鯉蟹黃等

菜四品爲其岳母手做味極甘美拜領深抱不安飯後命僕人整理行裝高等學堂

段卜臣鄉兄飭人送來蔭兒復電知老母無恙九弟來津料理各事畢已返南京讀

之欣喜不盡

宣統三年辛亥正月初一日

是日元旦晨起進元宵數枚頗可口作家書托武清縣王益豐鄉兄帶去又致武清縣李笏臣表弟一函中午同厲德珍齋古玩舖劉德泉鄉兄請喫水餃座中有賈子鶴及孫君諸同鄉適高等學堂郭瑞甫兄送來韭黃豬肉餃併煮食之極美不減家鄉風味也是日商界同鄉來賀年者甚多午後郭瑞甫段卜臣二君來談並各贈川資十金坐甚久始珍重而別晚間同厲德珍齋劉德泉兄設讌饒行座中有北京何建臣蔣潤田二君談笑甚歡十時始散余在西安耽延多日惜以不能自由未獲瞻謁諸陵一覽碑林之勝深以爲憾晚修兩函寄津一致南開校長張伯苓姻叔一致工業學校孫子文周味林兩君

省垣之北三十五里渭水北岸有五陵即漢景帝武帝惠帝昭帝宣帝諸陵墓長安八景一華陰仙掌二黎山晚照三雁塔晨鐘四草灘烟霧五灞橋雪柳六咸陽古渡七曲江流引八太山積雪 又有八水即灃洛澗涇洳渭滻灞

初二日 晨起早餐同鄉孟沛然兄來送並云即刻起身赴咸陽縣恭候大駕余當即辭

謝孟君堅執不允並云與咸陽縣令有舊當預先通知以便招待孟君行後倚裝修函三封一致天津諮議局閣議長一致同志會諸幹事一致武清縣梅廠鎮李笏臣徐少棠諸表弟午後一時與同席劉德泉賈子鶴何建臣諸君話別隨即登車起程由馬芳門穿撫署轅門直趨西大街大商號均在此街有票莊多家路經三晉會館建築雖不宏壯然頗精緻出西城商業繁盛城圍四十里每面十里甚宏大惟路政太壞大雪之後滿街泥濘車轍一二尺深騾馬行走異常費力人亦顛播難受西門內有陸軍學堂西門外即新軍混成協營盤地勢甚大頗壯觀瞻行距咸陽縣三里之三里橋係一大鎮市堡前即灃橋橋下即灃水距城不遠即長安八景中之咸陽古渡有小橋一道極長極窄行走甚危懼橋頭即古渡船河即渭水上游渭水發源于甘肅之渭源縣聞南行十數里有姜太公之釣台掌燈時入咸陽縣城即阿房宮舊址街市兩旁樓房齊整惜無路燈未能盡窺其盛停車大公館門前結彩懸燈輝煌耀目衣冠僕從十餘人肅立迎候縣尊劉公大城人誼屬同鄉加以孟沛然兄之托故有此特殊之招待劉

縣尊不便出面托孟沛然兄代表酒筵豐盛晚作家書托孟沛然寄津路見男女皆衣冠蓋往親友處賀年者古禮猶存惟衣履甚簡陋多夫婦攜帶兒女同駕一車者可見風氣之樸素矣我國古風何讓歐美可喜可愛西安以西所乘之車皆寬大車後有柱木一根與汴省相同以大木一根兩端用皮條繫于車尾下坡時勒緊車輪不能流轉以免危險其法甚善因西行步步高原登高下坡非此不能防險也

咸陽縣城較尋常縣城大逾數倍九門九關街市繁盛據土人云古長安城極大因歷代減縮東城劃爲臨潼縣西城劃爲咸陽縣云云若照此說則古長安城每面之大幾有數十里矣俟詳考之

初三日 早點後由咸陽起程孟沛然兄騎馬隨送出西北門回望城廓整齊猶存古都氣象行二里餘上高原即下車辭孟君請不必遠送于是彼此握手揮淚而別一路非坡即原幸不甚高尙無顛播之苦行四十里至章驛店早尖旅店房屋狹陋不能停驂遂與松君魏君等均在街市兩廊下向陽坐食土人以爲奇咸來圍觀蓋少所

見也尖後步行半里餘登車小寐及醒詢之車夫則距醴泉縣祇數里矣轉數土原
即望見城廓甚宏壯城上四角皆有高亭城樓兩旁凸出兩室爲他處所罕見進南
門穿城復出西門住西關旅店（西門內有宋伯魯太史第門前有節孝坊）卸裝
後擬一覽醴泉古跡松魏二解委皆云僅一石龍頭噴水流成一渠無甚可觀且在
北門外相去數十里之遙又無車轎可僱往返徒勞竭力勸阻余遂與魏解委遊覽
鄉村見一廟門前懸初等小學校匾因入廟參觀大殿前及兩廡皆土人圍聚賭博
喝雉呼盧興致甚豪繞至殿後始見磚房三間窗爲洋式蓋即學校之教室也門窗
鏤鍵闐寂無人不得入遂返歸途見路傍斷垣殘壁並無人烟詢之士人云此皆小
村落遭同治年間回匪之亂均被焚毀至今尙未恢復西北土質堅硬雨水不能冲
刷故雖已歷四十年而頽垣尙巋然屹立也該處民居皆以土築成衙署亦然仍遵
古代版築之制生活簡樸白麪每斤僅制錢十數文以故民皆安惰不思進取有由
來也

醴泉在縣城北門外由醴泉南行四日即歧山

初四日 早九時自醴泉出發登車時見有紅衣如北方之吹鼓手者數人立於店前細視衣前後白光中所書之字始知爲醴泉綠營所派之押解兵怪狀可笑路見身服重孝之男女携帶小兒女共乘一車者數起深訝新年中胡喪事之多也因詢問土人是何原因方知該處往親友家賀年皆着此服此種怪誕不經之惡俗苟非親目所睹絕不信也中國之大真可謂無奇不有矣行十餘里遙見高山巍峩詢之士人云係唐王墓不知爲唐代何帝之陵又十餘里又見山陵高峻詢知爲武后之墓氣象雄偉想見當日之淫威午十二時至乾州入驛館該縣距省城百五十餘里步步高原已相去數十丈聞永壽縣則高出數百丈矣天氣雖寒而土地則暖時屆嚴冬而一路草色青青可爲明証晚飯後與松解委煑食酒釀以爲消遣苦無鐵鍋以洋磁面盆代之煑成和以蛋清白糖味甚純美閒談片刻始各安寢

初五日 早八時由乾州起程經大街見有巡警教練所門前置一木枷荒謬可笑舉此

一端足見該處警政之幼穉矣出北門即上高原經一土谷長約十里與汴省之小山谷相似舉頭見武后陵墓巋然獨峙山前有兩土峯儼如門闕峯若乳形峯頂各建一廟不知何祀遠望絕似乳頭稍後大山中立最高處即武氏墓在焉墓以石砌頂圓如蓋極偉極高三四十里外即可望見當年工程之大可想而知少頃行經墓前車夫均下車洩溺有一小車夫約二十餘歲忽至車前強余下車余問何事答云下車小便余告以此時無須彼謂我等車夫皆泚武銀你大人爲何不泚武銀余不解所謂松解委笑爲解釋余始恍然（武氏名墨粗人不識此字誤讀作銀且銀淫同音當時或以武氏淫即錫此佳名亦未可知千數百年以訛傳訛無從追溯其源矣）因亦笑而下車小車夫欣然喜躍扶余至山前強溺少許據車夫云凡男子之行經此處者無論老少貴賤必須對墓便溺從來如此非一朝一夕矣噫如車夫之言豈千數百年來皆如是乎甚矣怨毒之於人也執政者可不鑒諸登車前進路見彩衣紅裙面罩青巾之婦女騎驪馬赴親友家賀年者數起有襁負或懷抱小孩者

男子控纜前導上下坡騎坐甚穩蓋習慣也女子皆纏足形如小角黍父母愛子無所不至獨于纏足則忍心爲之此風一日不除民族何由強盛事雖小而關係甚大有心者其努力圖之西安省城女學官立者祇一處學生不過二十人私立者有兩處學生皆不過數人聞今年均已停辦矣惟距省城九十里之三原縣則風氣大開官私立之女學已有五六處學生亦極發達可喜可慕行五十里午一時至監軍鎮早尖因在新年俗例不過初五大小商店均不開市旅店亦不招待客商不得已暫借巡警局休息出自帶饅首掛麪及路菜聊以充飢二時起身五時餘行近永壽縣下一峻坡積雪凝冰車行滑不能留駕車牲口傾跌者再幾至不能行走惟有聽其自然溜其勢危險異常進城住南關大公館晚十二時寢大風怒號加以兩股疼痛展轉不寐蓋日間行約百餘里步步登高顛播不寧之所致

永壽縣距西安雖不足三百里已高出數百丈蓋皆沿黃河流域即帕米爾高原之山脈也人民多在山坡下穴居河南之穴居祇有一洞而陝西之穴居則大洞

中左右又穴三四小洞如複室然富者以磚砌門內如穹窿中產之家砌以土坯普通貧戶則僅以樹枝夾穀草爲門掩護洞口以避野獸而已山中居民皆飲窖水（積雨雪水存于地窖中以爲飲料）味甚鹹不適口余尖宿地方幸均有鑿井深三十餘丈吸水叙次輪流以兩人力絞轆轤始能上升永壽縣城甚小居民僅數十戶無車輛可僱不得已扣留上站之車發價送至邠州名曰打過站車甚寬大可以伸足睡眠惟皆大敞車須預在西安購備毡圍臨時懸釘轉比轎車溫暖一路無清泉可飲茶用湖茶粗枝大葉無甚佳味即京貨舖所售之瓶裝京茶亦不過北方尋常所飲之香片粗茶而已

初六日 早七時餘由永壽縣起行城在山坳中四圍皆高坡車進南門見有小學堂一處文廟甚修整城內僅小街一條商店十餘家復出北門一路非高原即土谷忽上嶺忽下坡行走甚艱御者時勒拄木以防危險人畜皆苦路遇商旅皆以三四套大車運載布匹雜貨橐駝高脚車則專運磚瓦茶葉至蘭州回時則運蘭州水烟及固

原牛皮二種一路無樹木亦無一村寨因民皆穴居遠望四面山腰窰崗棋布星羅
二三里內皆是窰上仍然種植照常行路問之士人云窰中冬暖夏涼鑿時開一縫
以通天光空氣以不漏水者爲上若遇土性鬆軟則不能開縫窰崗上行車馬窰中
毫無聲息惟羊行其上則窰中聲音甚大此理不可解農人多種春麥玉米兩種高
梁甚少行二十餘里下一大坡有山澗一道水深尺許路僅容車頗不易行澗水時
濺車廂行至澗寬處有商人車多輛一陷澗邊以至阻路稍候始通又行四十里至
太峪鎮早餐該鎮有店舖數十家三時半至邠州城在半山間遠望頗似畫圖入城
時遇童子六人着戲衣扮雜劇各騎一馬有鼓樂前導名耍娃娃蓋是日立春除地
方官迎春外鄉俗如是耳過州署有一石城與外城相掎門上有石額題邠州二字
蓋卽州署之大門也又行數十步卽入公館卸裝稍休同松解委遊覽街市祇東西
大街一道問之士人有小學堂一處因時晏不及參觀晚飯後追一思日之所經忽
上嶺忽下坡忽高原忽幽谷或山邊澗底或斷岸懸崖忽而賞心悅目忽而驚心駭

目一日之間所遇不一人生遭遇亦猶是耳余日疾大愈得以縱覽風景襟懷舒暢精神頓爽雖沿途顛播勞乏尙可支持

陝甘新三省金融情形銀元不能通行銅元亦無所通用者仍惟紋銀與制錢耳
西安省城每銀一兩換制錢一千四百文左右聞甘省每銀一兩換錢九百文新省則祇換紅錢四百文而已余在邠州兌銀十兩備作途中費用每兩換制錢一千三百文有零

初七日 早七時由邠州起身出公館西行街市尙繁盛街北有里民總局自治公所與簡易識字學塾均附設局內間壁爲城隍廟廟門懸自治研究所牌再西行街北有巡警公所附設衛生清道兩局街南有巡警教練所建築頗宏壯間壁有勸學所祇鋪面小屋一間室中一棹兩椅外無他物據土人云各局所均係外面虛掛一牌內中空無所有有名無實率皆如此以故城中無一崗警街市中聚賭者有之鬥毆者有之無人過問新政如此可爲一嘆出大街過文廟即曠無人烟西城尤爲荒涼祇

一火神廟門前懸小學堂豎牌想亦虛有其表耳因勞乏未曾參觀以一直隸州城內居民千數百戶而祇有小學一處教育如此何日方爲普及時也出西門過一石橋梨棗成林一望無際（邠州梨棗出產最著）行十餘里至花菓山山周數十里皆梨棗樹山上並有柿樹遙望山坡洋樓十數層牕櫺如蜂房密布心頗疑之及行近細視始知皆居民窰崗遠望宛若洋樓也山之最高處有石碑一通大書聲聞于天四字山腰懸一木梯甚長蓋居民出入窰崗非梯不可據云該窰崗係同治年間人民因避回亂所鑿山後約五里即水簾洞洞前有廟祀孫悟空每年八月十五日鄉民演劇酬神否則必大風雨不利於菓木廟內大殿後即洞門洞口甚黑暗非結伴不敢入稍進數十武有石隙通天光約一里之遙始達洞底有殿一間塑孫悟空坐像手執金箍棒此皆得諸土人之傳言惜行程匆迫不獲遊覽爲憾過花菓山里許上一山坡適有貨車十餘輛下坡狀甚艱險人畜均苦上坡遠眺對面高山蜿蜒不斷中有河流（即涇水）兩岸微冰南岸灘地梨棗成林北岸則樹木稀少河中

泊小船三四隻如北方打鴨雁之小艇涇河倘能挖深可以藉利交通惜無人倡辦耳又行十里過大佛寺建築如亭上下計三層依山修造因原係山洞故即以洞門爲廟門山石均淡紅色寺前有民居十餘戶余等下車遊覽解委魏君先上余以台階甚高命車夫扶掖以登洞計五層初入甚暗下階四五級即達洞底有金面如來佛像一尊就山石鑿成高八丈五尺盤膝端坐一手平伸一手搭膝上兩傍侍像二尊白面赤足眉目如生法身亦高數丈古人藝術之精非後人所可企及洞頂及四壁均就山石鑿成小佛像無數洞左有石級數十磴因循之上頂頂有平台及小室數楹東偏爲二層洞頂上刻明鏡臺三字有弧形門三門中各設佛像一尊可窺大佛及兩旁侍佛之面中門內有光緒年間銘軍統領劉盛藻潘萬才重修之石碑一通上懸「去天尺五」匾一方又有甘肅藩司毛君實匾對時松解委已覽畢下行告余曰上洞祇見佛頂別無可觀五層上尙有一殿惟無石級可登僅有石窩容足上下不易余遂不復上折而東行擬覓住持僧道或古石刻一究其源均不可得傍有

客堂因入內小憩片刻即與松君同下石級旁有康熙年石碑一通因耽延已久不及細視廟外有小木器舖三五家買棗木棒槌一對擔桿二枝以作紀念登車又行二十里下坡時見有貨車多輛駕車牲口或十頭或八頭觀其狀仍甚艱難交通不便商旅苦矣至黑水（卽亭口鎮）見有楚南飯館喜出望外因停車早尖該館房間窄小不能容多人余與解委等遂在門前向陽而坐進肉湯麪及雞卵等飽餐而行登車後行未遠上一坡坡上即高原路途平坦直至涇州所謂陝之北原即此處也下午五時餘入長武縣南門縣署大堂之西偏即大公館宿焉途中可記者甚多因早晨路經一山寒風刺骨病眼爲風所侵痛甚不敢過用目力

長武縣南關外有農業試驗場實業小學堂城內有小學三處高等小學一處工廠一處又有高紳私立之模範小學一處陝省之西新政當以該縣爲最

初八日 晨五時即起守候車馬直至七時始由長武縣出發行三十里至姚店此處爲陝甘分界姚店東街屬陝之長武縣西街則屬甘省之涇州矣而東西街之風俗亦

各異可謂恠事又行三十里至高鎮早尖飯後登車忽傷風精神不爽掌燈時至涇州南關因該縣公館坍塌覓旅店宿焉城內有煤油路燈陝西省城尙無此新政不意于甘肅之外縣見之晚飯後精神疲困四肢酸痛勉作家信一封托解委回省時交西安高等學堂郭段兩君轉寄天津是日途程名雖百里實則百二十七里故深覺勞乏甘肅男女裝束大異陝西男子多着紅鑲鞋女子在頭頂上帶一馬尾羅之假髻長有尺許其形如船從後望之頗似獸尾可笑可怪

初九日 早九時餘始自涇州起身因甘省無差徭由官車局備車直送蘭州故啓程較遲涇州城築在涇河灘中穿城出北門二里餘過涇河水不甚深即乘車渡河遠望

王母山山不甚高多青石

陝甘多土山石山甚少出產無多

山頂有王母宮遠望碧瓦紅牆林木翳翳

風景頗幽邃山下有一廟廟後層列古崗三排第一層一崗二三兩層每層均三崗

山腰尙有一小廟山麓有接官廳旁立古碑一通鐫古瑤池降王母處七大字

現降字已

泐僅存六字

據云周穆王夢王母請宴于瑤池醒而立碑鑿池以答神庥山上古崗不知

是否即王母所降之處山後有王母遺族聚族而居王母山對面高峯有寺中有曹子建碑一通古物也惜知者甚鮮余以行程匆促且不得自由未能遍遊詳考深以爲憾又行三十里至王村早尖詢諸土人云瑤池離王母宮約二里餘在山坳中建有神殿池在殿前上有天花板彩畫二龍映入池中池邊有石柱刻龍繞柱上龍口終日滴水水甚清冽可以治目療疾頗著靈效以故求水者接踵香火甚盛每年正月間鄉民釀資演劇酬神即余等經過時也飯後行數里有王村之紳董李君載酒果歡迎意極懇摯因席地飲酒三杯進麪果少許拜謝而別李君此舉通都大邑所罕覩今乃見諸邊陲僻壤令人益增感慨五時至白水驛擇一較大旅舍宿焉遍地騾馬糞骯髒異常臭氣薰人欲嘔晚飯後枯坐無聊適該鎮社火

村俗每值社日鄉人舉行賽會名曰社火

經過旅店門前松魏二解委邀余同出觀覽藉遣苦悶因購買爆竹一掛燃放以表歡迎所謂社火者前有大鑼大鼓引導後有六人持高竿竿上各挑一篋製紙燈四人在後歌舞會首則扮唱雙官誥士劇名絃子腔另一人彈南絃子一人擊小鐘一

人搖木板和之其聲調雖不甚懂細聽亦有節奏惟各人所扮形狀奇怪陋劣不堪形容一似毫未進化者此處人民之程度如此去自治立憲不能以道里計奈何奈何與松君買茶點四包酬之因觀社火就寢稍遲加以馬糞燒炕臭氣觸鼻一夜不能安睡該處有天主堂甚宏壯警察與學務無甚可觀

初十日 晨興稍晏八時始由白水驛起行經該鎮市街見有四川麪館因邀松魏二君進早點（甘境尖宿各地多湘蜀退伍兵勇開設之小飯館猪肉雞蛋鹹菜以及油鹽醬醋一應俱全較諸汴陝兩省境內尖宿處祇有白水煮麪條粗麪饅饅即求油鹽亦不可得者天地懸殊而回思平日之享用不啻暴殄天物矣）行三十里至四里堡早尖兩日來均沿涇河南岸行走沙灘上行車甚穩甚適而兩旁均高山山麓有村莊樹木山腰則梵宇琳宮山頂有堡圍兩山之中涇河蜿蜒風景清幽余等儼如在圖畫中行襟懷暢適三時至平涼州

即古之高平關

之東城外商業繁盛人烟稠密

又行里許過一土嶺始進城城爲長形城內大街一條長約數里官廳有道府署余

等覓一旅舍宿焉房屋小而潔非復昨日之臭氣薰人矣涇州刺史韓公適同寓余過涇州時值韓公公出今遇于旅舍特遣价持片道歉晚間大雪枯坐無聊偶見粉壁上有覺園氏題詩蓋韻隴中旅行狀況刻畫逼真極情盡致錄之以見一班惟不知覺園氏爲何人留以待考

戲題

頻年蹤跡半天涯旅店爭如隴上佳檐慣打頭門畫狗

用晏子狗國狗門事

居難容膝國真

蝸烹泉須乞隣家火托鉢莫供老衲齋

店中不賣飲食名曰乾店

人與馬牛同一窟斯民端不愧

無懷

多謝居停禮數賒爐頭無酒灶無茶屋薰煙黑疑髹漆牆抹泥黃半雜沙獸吻支

槽同案用馬通燒炕當薪加忽驚燕壘飛螢火碗跌燈台正結花

壁間附泥若燕巢置破碗注油作燈

車牛雜沓貨闌干滿地勃澍下脚難香爲穢多艱避臭炭因墻破不勝寒我甘瓢飲猶嫌陋此後巢居亦覺寬昨夜雪花深一尺床頭旅客盡袁安

生性廉平不愛錢

店中一物無有故取價殊賤

由來北道主人賢惟餘葦箔能舖炕縱有蓬牕亦

砌磚

窗戶多以土磚填塞故屋暗如晦

地窖水儲三伏雨

安定一帶無井泉夏蓄雨水地窖中以資飲料味極惡劣大碍衛生

柴門雲鎖萬

家煙

傍晚各家均燃艸煨炕烟氣四騰呼吸為塞

將軍負腹除閒事贏得更深一枕眠

右詩偶得於途次欲題壁間而無處下筆頃稅駕於此見粉牆光潔率而書之非以誚此間居停也若此店者誠鐵中錚錚者矣丙午夏至前一日覺園戲題

按平涼城騎山建築頗占形勝道府同城東關大街見有懸東關巡警分局者經詳細調查有名無實故入城後巡警並未看見一人學堂亦無新政如此可憐可歎東西關各有福音堂一處建築整齊餘無可觀

十一日 雨雪早九時由平涼縣旅店起程出城後風雪益大山巔水涯林梢屋角一望

如銀絕妙一幅輞川雪景圖也雖風雪載途嚴寒貶骨而精神倍爽亦不覺其苦矣

平涼城北四十里有崆峒山山後有老龍潭據云即涇水之源山上有廣成子洞黃

帝問道于廣成子即在此處周穆王漢武帝遊幸崆峒皆駐蹕於此山上有秦漢古

碑數通甘肅提學使葉公爾愷築屋覆之以免風雨之剝蝕此皆得諸傳聞原擬繞道一遊以不獲自由未能如願悵悵行數里渡涇水河甚淺乘車逕渡登岸即上大道古楊高四五丈夾道整齊一望無際此路由潼關直達新疆寬處逾十丈窄者亦五丈餘左文襄西征時所築也左公魄力雄偉令人欽仰十里一塘墩墩上均建一坊書明距城里數墩旁有營房若小衙署大墩並設有汛官傳遞公文建設均甚整齊非如河南陝西只賸殘破烟墩而已（烟墩爲我國古代國防設備遇警即舉烟火號召軍馬今則門戶洞開留此古跡以供後人憑弔耳）行四十里至南古鎮早尖雪仍不止飯後冒雪前行一路雉雞甚多亦不畏人是日因道途溼滑不及趕瓦亭宿站行至二十五里之蒿店宿焉晚間該鎮有社火首事者呈帖獻戲意甚殷勤因與松魏二解委燃炮歡迎先有八九人圍一燈傘旋舞似北直之地秧歌唱張良賣布小戲一齣小有穿插惟腔調不佳演畢酬以大錢二串點心四色而去今日雖冒雪長征尙不覺過勞所苦者惟車前着黃馬褂之諸老將飽經風雪耳（陝甘綠

營多着黃馬褂亦有穿紅馬褂者每日奉派押解過境故車前均有兵數十名或十餘名前導余在車中默想昔日左文襄西征時大隊業已前進護從大帥者或亦不過如此雖事殊勢異卽作如是觀有何不可一笑。綠營兵多老弱無用不過虛糜國帑多養成遊惰國民阻碍社會之進步耳蒿店婦女均時裝梳蟠龍髻留劉海髮人民之生計甚艱窘吸鴉片者甚多以致養成惰性耳

十二日 早七時發蒿店行四五里至三關口兩山環抱間有董少保福祥故里石碣一方該處居民甚少祇看董少保祠堂者一家石碣後有關帝廟廟內住一三家或亦守廟者耳廟中正殿祀關帝兩廡塑楊五郎楊六郎像廟前清溪一道水流激湍汨汨有聲溪曲處建一小亭上懸聽濤小匾一方亭後有土阜上有廟宇屋僅三楹山水清幽塵襟盡滌停車良久不忍遽去頗動出世之想復行二十五里十時至瓦亭驛早尖該處歸固原州管轄刺史王公于數十里外特派差預備公館酒席令人感謝不盡否則山村茅店惟白水煮麪條聊充飢渴而已固原提督又派哨官馬炳臣

帶同馬隊十名護送飯後行十五里至和尚堡有店舖二三十家行距六盤山數武

停車加稍

山路奇險每車非加牲口三四頭不能過山

值山下停有客貨車十餘輛亦正在互助加稍松解委

因飭固原州差向客商借牲口再三不允州差欲回州城要騾馬惟今日須住此

等候馬哨官謂此處並無旅店焉能露宿因帶馬隊將貨車之牲口強迫牽來十匹

加稍上山客商等敢怒而不敢言惟有俯首聽命派車夫照料牲口隨同過山惟彼

等則露宿一宵矣六盤山爲由陝至甘必經之路上山六盤十里下山六盤十里山

徑奇險

隴海鐵路亦因其險而繞道修築

且時常下雪雖盛夏亦然尤不易行昨日雖然大雪幸尙未

凝冰不可不感上帝之默佑矣上山三四里即過頭盤紆回曲折難走非常加以稍

馬兩排連車身計之長約五丈有餘盤旋險道稍一不慎失足下墜則人畜立成齏

粉行人無不危懼松魏二解委均下車步行力勸余下車不可冒此大險余以殘疾

腿步履維難惟有聽命由天謝之過三四盤至半山有廟宇及店舖四五家車夫及

馬步隊均暫停休息余亦飲米湯一碗喫蕪花一根坐車轅下望山麓樹木人家均

極渺小目爲之眩復行至山頂祇店舖一家塘汛與接官廳皆殘破不堪本擬下車一覽四圍風景無如寒風刺骨手足皆僵力不從心遙望前面數峯山頭積雪縹緲如霧下視則白氣氤氳恍如身在雲端亦奇景也車上嶺時車輪各繫一木燕遇險則托住下嶺時則將車輪用粗繩結牢不令轉動法至良也下山兵勇前導其行甚速轉瞬之間已至山下之楊家店諺云下山容易上山難誠不誣也該處有店舖數十家又行數里見山坡立二鹿相去約三百步因請馬哨官射之發槍立斃其一咸贊馬君槍法之精馬君遜謝不遑並云甘省軍人多回教徒射擊之技均訓練有素故所帶馬隊無不精悍將來組織國防軍皆有用之材也晚宿隆德縣東關內旅店中該縣程大令河南人招待甚優此處火盆棹凳等傢具皆土質猶存古風晚餐馬哨官餽鹿腿二肘鹿筋一束異味初嘗非常甘美賞馬隊二金酬之

甘省男子皆用藍布包頭與陝豫相同惟陝省男子多持二三尺長之旱烟管爲特異耳甘省民居平民住窯者十之二三富室住瓦屋四圍築土牆如營壘屋頂

斜坡若道士冠以備流水並設有瞭望樓或在山頂或在山腰所以防盜賊也

十三日 早七時自隆德縣出發行四十五里至神林鋪早尖飽餐鹿脯下午五時餘至靜甯州宿于大公館州尊馮省三刺史來拜款待甚殷甘委李子珠大令已至靜甯迎候李君湖北人前陝甘總督李廷簫之公子人極開通頗有肝膽與余一見如故靜甯州水土甚佳出產蔬菜如白菜蘿菔菠菜等甚富平涼一帶皆仰給於此距州城三四站爲祁山縣即武侯六出祁山之處也

今晨五更在隆德縣旅店睡臥正酣忽夢與一官同車（醒時不憶是何人）又一車爲李笏臣趙式郁二君同坐恍惚之間祇賸李笏臣一人送予赴新路經宜興埠本村之大街遂一同下車到家省視住宅似爲楊氏大樓（余幼年讀書處）所改造父母妻子均在屋內談笑見余歸均甚歡悅正在述說別後情形忽然驚醒悵惘久之登車後追思夢境頗動歸思

十四日 早八時自靜甯州發因所經皆高山峻嶺即由該州代覓稍馬十餘匹隨行備

用州城貿易繁盛屋宇整齊出城約十里即掛稍馬（每車非六七牲口不能上山）登齊家大山初上一大嶺險峻已極行走甚難繼過二小嶺又登一大嶺約行數里始至山頂停車四望已在萬山叢中車登山時屢屢倒溜幸上山時車後繫木燕下山則用繩牢結車輪得免危險惟注意牲口之失足耳行四十五里午二時至高家舖早尖飯後又行四十五里七時至青家驛宿于旅舍三四日來因雪後嚴寒手足皆凍

十五日 早七時由青家驛起程四十五里至翟家所午尖一路高嶺低坡而雪後結冰路途堅滑異常難走最後過一高山由馬隊強卸客商貨車牲口多匹加稍始克越過（客商行走山路必須結幫因上山時非六七牲口共拽一車不可又須預先派人過山止住來車否則雖已至半山仍須退下讓路艱難至此可爲深慨）二時餘由翟家所起身行十餘里入一山峽長約二十餘里土名黑龍江春冬兩季祇一小渠沙灘尙可行走夏秋則水之深淺無定若遇山水暴發危險尤甚左文襄西征時

曾由此道解餉餉車數十輛被水冲刷無蹤然又別無他徑可以繞越以故夏秋間行人至此無不危懼掌燈時入會甯縣城內外兩城外城甚大城內外貿易皆繁盛今日爲元宵節人家門前懸燈街市尤爲熱鬧公館假用高等小學堂舊時書院所改造會甯一帶水甚惡劣澗水皆死水多紅色鹼質甚多洗臉後皮膚皆破

十六日 晨興擬參觀所寓之高等小學堂上課行至教室闐無一人詢諸縣役據云縣署中派教習一人每日到堂上課惟時間遲早無定學生亦不多邊省教育如此可

爲一歎八時由會甯縣起程行二十里至雞兒嘴茶尖尖後過一山溝長約二十里

天晚不易行有路截者一時餘至西鞏驛驛舍住宿此一站僅六十里故休息稍早飯後與陝委

松魏二君甘委李君作葉子戲名打勾角用黑油紙牌一百八張打法與北方之天九老辭相等打畢甘委李子珠大令詢悉獲罪緣由極抱不平即屬函告家中赴都察院控告陳督欺朦君上摧殘民氣之罪李君古道熱腸令人感激遂函告桐君妻在津商酌進行夜一時半始各就寢驛舍壁上又發現覺園題詩數韵詢諸李大令

據云係甘肅首府趙支山名惟熙覺園其別號也此間水尙可飲每家門前有一土
台上有木蓋加鎖蓋貯存雨雪水之處其寶貴可知

十七日 早七時半由西鞏驛起程在山坡中行十餘里即掛稍上清涼山至絕頂約數
里山路高而陡左文襄修築土牆爲欄減去危險多矣惟山爲土山道平而滑雪後
凝冰堅滑更甚騾馬行走其上艱苦萬狀載重車尤甚又行三十里越數山至小清
涼山早尖尖後行四十里至安定縣宿縣署附近之驛舍縣令劉春堂爲保定劉春
霖殿撰之胞兄因晉省未晤特派縣署之帳房招待甚爲優厚並餽程儀二十四金
據該帳房云曾接我們二老爺來信特屬從優照應縣尊等候數日刻因公務進省
又送來清茶一小壺云此間飲料甚艱此水僅有一小缸存貯縣署上房係取諸數
十里之外往返須二日專備縣尊與夫人平日之需餘人皆飲鹹水縣尊招待之殷
舉此可見一斑余等在清涼山尖站聞旅店中人云此一帶飲料惡劣並窖水亦無
供客者皆由數十里外取來必至甘草店始有清泉可飲晚飯後同人渴甚以隨帶

之梨橘等代茶然不能解渴陝委魏君向武營覓得清水一壺烹而分飲之倍覺甘美可謂渴者易爲飲矣就寢前發直隸自治總所齊燮齋君一函附家信托齊君代轉

十八日 早七時半由安定縣驛舍起程冒雪長征道路濘滑直至下午三時祇行七十里達稱鉤驛尖站因行走艱苦人畜皆乏不能再進遂就該驛之官舍宿焉馬哨官餽余羊羔一頭因又添購肥雞二隻此間五味無購處祇加鹽少許烹煮請諸解委及馬君共飯滋味之香美異于尋常是則飢者易爲食矣飯後仍作葉子戲（打勾角）以消跋涉長途之苦此間水味既鹹且澁鹼質甚重由武汛送來冰雪煮水爲茶尙可飲

驛舍壁上有詩係軍諮府派赴新疆檢閱新軍正使吳公祿貞字綬卿所題描寫隴

西一帶陋俗極情盡致讀之捧腹原詩惜未錄存深爲遺憾中述一奇怪風俗不可不記該處鄉俗擇婿年齡以十五六歲者爲合格必先與牝驢作一度之性交

以勝任而愉快者爲中選名曰跳驢不擇地點率皆在街市中爲之任人參觀余初未敢深信及詢問聽差之地甲所答不謬且云鄉俗如是凡結親者非先跳驢不能訂婚街頭常常有之倘能多住三五日即可看到惜余不克逗留未能一飽眼福而此種野蠻怪異之事苟非親歷絕不肯信真可謂天地之大無奇不有矣

十九日 早八時一刻在稱鉤驛坐尖起程出行臺門咫尺即車道嶺嶺旁又有一峯風景甚佳惜匆促未及瀏覽行未數武即掛稍上嶺嶺不高而長雪後道路結冰稍馬多滑倒跪下者厥狀甚苦行平嶺顛大風忽起嚴寒徹骨行六十餘里約下午三時始下山坡復過一溪至甘草店驛館宿焉是日該鎮之大街演劇遂與解委松魏李三君至街頭小飯館小酌見街中搭小戲台如小屋然台上兩旁坐有鼓樂者五六人中設棹椅各一餘地已無多矣所演者皆二三人之小戲音調似甚古雅詢之李子珠大令始知即古之西涼腔余于無意中得聆我國數千年前之古音何幸如之既思隴上自秦漢以來已數千年之久更歷十餘朝而依然未曾進化又不禁爲我

國改進之前途憂矣驛舍屋宇高大雪後奇寒見街頭有售木炭者購得一簍爇之禦寒夜間即以餘燼置于床下溫暖殊甚一覺酣眠異常舒適自起行以來尙爲破題兒第一夜也

二十日 晨八時在甘草店坐尖起程行二十里至清水鎮行台休息該鎮屬金縣管轄知斯邑者爲李春浦大令河南光州人與天津女子師範學校監督吳君藹臣爲鄉榜同年又係至好聞余過境特派家人遠來百里外預備酒席招待盛情足感因領杯酒十一時行十里餘過一大溪又十里經夏宮營又二十里至金家岩行館宿焉而李春浦大令已出境六十里迎候於此彼此一見如故並出視吳藹臣君托爲關照之函讀之令人感激當陪回晚餐相談極其歡洽該處兩山夾溪岸多稻田見有水磨數處頗似揚子江沿岸風景李春浦大令云此間人民向種烟葉以罌粟利厚多有改種罌粟者去年蘭州府張太尊炳華帶同委弁親至金家岩督飭農人剷拔煙苗激動衆怒聚衆至行台將張太尊脇骨及右手二三指打折風潮頗大事聞上

憲立將首事者四十餘人正法農民始畏懼今年不敢再以身試法矣李春老又云此間房屋均係土築即衙署除大堂二堂外亦然棹椅等什物亦皆土製蓋回民之亂衙署民居多被焚燬迄今未能恢復甚有租用民房作衙署者蜀隴邊境地方官率多如是有一縣官坐堂皇審理案件驚堂一拍土案下忽竄出一狼（邊境多山野獸時入城市土案中置木板故易于藏躲耳）地方遼曠人煙稀少可以想見真奇聞也

二十一日 晨興纔五時李春浦大令即來余室蒙贈程儀十二金及路菜多品情誼懇摯惟有拜領旋又陪同早餐談至七時始再三珍重而別登車行十里經一流沙灘寬約里餘中有溪水數縷灘上有鵝卵石大者徑一二尺車行其上極感顛播之苦腦如刺痛又十餘里至響水子驛茶尖尖後行三四里見黃河上流在兩山峽間河面寬約二三丈水清流緩冰凍有二三尺厚者據土人云河深約三四丈水大時間亦淹沒農田遙見邊牆遠望如黃土圍堤

此即長城直
通嘉峪關

又行十里上東崗坡坡雖不甚

長大然皆石路難行有新軍五營駐紮于此下坡爲平原二十里抵甘省蘭州府之東城外經五泉山有廟房屋甚多入東城大街極長然石路崎嶇異常腐敗省城中始有崗警精神萎靡其新政可知矣路見劉剛敏公劉忠壯公兩祠堂均征金積堡陣亡者督院亦在東門內頗宏壯城中貿易繁盛出西門寓甕城中慶陞客棧係蘭臯縣所指定夜晚內外城門關鎖儼然一特別監獄此等差使地方官大費心思既不敢任其自由又不便實行監禁祇可用此似是而非之辦法以防衛之而直督陳夔龍小石通電沿途各省督撫謂余精通法律能爲極大慎勿等閒視之非派一二千得力軍警嚴加防範不可各省大吏多陳督一流人物接電後均驚惶無措其實不過一衰朽殘疾之人耳謬承過譽惶愧惶愧思之失笑自西安至蘭州名爲十八站實行二十站自正月初二日由西安登程一路未停長行二十日始抵蘭州沿途艱苦備嘗青年人苟乏冒險性者絕不願輕于嘗試况殘疾之人哉然苦則苦矣而多此一番經歷實地考得邊省情形亦生平之大幸蓋縱有多金無從購買所得亦

差償所失此聊足自慰者也

二十二日 連日辛苦加以鄉思羈愁心如潮沸睡不能安早七時卽興腹甚飢飭僕購

豆漿及燒餅油條因離家日久頗思鄉味惟祇購得燒餅油條做法亦與北方不同

九時冒雪出門拜訪同鄉商號恒豐裕王君雨田尙未起身卽至中興厚訪雲倬樵

表弟（現任甘肅商會副會長）托發安家電報及購備衣服被褥等物又偕雲表弟

訪慶盛和朱君景平

新城人

未遇遂偕訪新泰興洋行侯君崑源

天津西沽人

托電致天津

商會總理王君竹林及甯君星甫商借二百金爲旅食之費因由甘至新出嘉峪關

過八百里瀚海及大小戈壁（卽沙漠）道阻且長日期甚多一切食用均須自備

故須預爲籌措充量備辦午十二時歸寓早餐飯後作家書陝委魏君來甘委李君

來贈吉利菊花云可以療目疾雲倬樵表弟亦送皮褥來並偕朱君景平拜訪又告

余電報局奉上憲公事凡有溫世霖支英字樣之電報一概不准拍發余聞之異常

憤激雲表弟及朱君竭力勸解並負責代爲設法准能成行暢談甚久始別寓外忽

也晚間獨坐萬感交集百脉沸騰因持小說一冊聊遣抑鬱李子珠兄荐一長隨陳

海來湖北人因舊僕高升不願至新故也湖北商會會董陳君來拜畧坐卽去

二十四日晨興閱時計已九指盥漱茶點後命僕人置辦零星用物李子珠兄來約至

伊公館晚餐特開家藏三十年老花雕一罈爲余餞行坐間只二三至友相陪談話可以不拘並云家有侍婢二人一十七歲一十五歲已與其夫人商妥于二人中請

余選擇一人贈爲筵室俾侍巾櫛席間可以一看蓋因新省政治黑暗非言語所能

形容天高皇帝遠無法無天遣戍者孤身至新恐有監禁之虞若携家眷則可通融

在城內賃屋居住有前年北京新聞記者彭翼仲携眷戍新之例余聞之深感子珠

兄夫婦之誼重情深令人沒齒不忘當告以臬司派差監視不准出門謹辭盛餞並

辭謝贈婢之高誼子珠兄以業已銷差而押解赴新之委員折君尙未晤面無人負

責適雲表弟偕王子元兄送來代購之皮箱羊皮袍箚及藥品等物子珠兄即擬移

席來廝面約雲王二君作陪均再三婉辭而罷略坐稍談始各辭別新解委折少蘭

大令偕武解委鳳君秋圃來面商起行各事談次得悉李子珠兄因與余往還被陳

藩憲得知牌示停委三年

即三年中不委署缺不委差事

余聞之憤愧交并子珠兄以熱心被累尤抱

不安當經商諸折君轉請縣署撤回監視之捕役折委慨允立赴縣署辦理陝委松

魏二君來適李子珠兄送來翅參雞鴨四簋紹酒二壺因留松魏二君共餐飯後寄

西安高等學堂段郭二君函夜間夢與桐君妻回家途中涉水衣履盡濕醒後疑慮

莫釋深恐桐君亦爲黨案所涉因之久不成寐

二十五日 九時起身命僕購買途中需用物品余獨坐無聊因至旅舍對門書肆中購

品花寶鑑五才子等小說數種以備途中消遣擬函致五哥九弟及津中諸友好以

連日事多拂逆心緒不寧不能握管而目疾復發午餐後行五百步服藥小睡是日

原擬拜訪諸同鄉以雪後道路泥濘故終日未曾出門看書遣悶晚飯後強制煩惱

作家信一封直寄南京

二十六日 晨起拜訪同鄉商號商籌旅費知雲倬樵表弟及王子元劉林讓諸君已自

動發起向五省同鄉募捐業有成數余聞之感激不盡雲表弟留午餐飯後回廡解
委折太令來述上憲催促登程惟只給車一輛火食與家人無車如何能行上司殊
不盡人情談次松君龍臣魏君子生李君子珠先後來厲余當向子珠兄道歉折松
魏三君亦竭力勸慰李子珠兄頗不介意並云一介微官雖參何惜殊不願失溫君
良友也余聞子珠兄之言中心尤爲感激風塵知己邂逅訂交不謂齷齪世界中尙
有此肝膽照人俠骨冰心之同志一念及此不禁熱淚縱橫矣余復憤然謂子珠兄

云我輩今日處于一班裙帶官僚

直督陳夔龍之妻拜慶親王爲義父陳得其妻之內助
遂陞直督胞叔陳璠復附姪婦之餘勢亦得甘肅藩司

惡勢

力之下不得不暫時忍受預計三年以後吾儕必能揚眉吐氣不過駑駘如余未識
能不負良朋之期望否子珠兄知余等車輛不足當云有友能代向臬司陳說要求

再給一車余遂拜托子珠兄設法雲倬樵表弟與王子元兄陪同毛君仁軒

寶坻
縣人來

訪並述毛君已函懇甘督長公庚竭力維持余與毛君交無一面廼蒙熱心如此實
爲難得余乃當面拜謝子珠兄仍申前議欲將二婢送來寓中選擇余以心緒惡劣

辭謝再三子珠兄以大義責余應知一身所負之責任極爲重大切宜爲國家愛護保全不可大意此次之納妾係爲保護此身與尋常富貴人娶姨太太者不可同日語幸勿固執在座者均以爲然子珠兄復云小婢既不欲納即推雲君負責從速物色一人年在二三十歲之間處女孀婦均可期以三日閣座同意復暢談許久盡歡而散

二十七日 早晨忽有甘肅電報局領班電員桂君寶鑒來訪

桂君安徽壽春人爲天津易阡局總辦謝君藍田之令甥

並

介見陳君克義

安徽鳳陽人

云頃從香港來係奉同盟會孫會長逸仙先生之命因聞有

遣戍新疆之旨深恐途中或有意外特派沿途保護以備不虞當即趕至天津訪知業已起解因復兼程追蹤始于昨日趕到故今晨特偕桂同志趨候余當即慰勞再三並告以此事發生之顛末清政府祇將余放逐邊境于願已足並無加害之心請轉達孫會長放心並代謝盛意將來至新之後仍當努力推行會務倘有機可乘即行發動當又詢問陳君各省會務情形悉均猛進突飛深爲喜慰陳君之意以奉命

而來既已至甘仍欲護送到新余告以絕無危險力辭始各道珍重而別同鄉張子明王子元二君及雲表弟同來面交諸同鄉捐助路費清單其中以商界居多豫皖五省大同鄉尤極踴躍至政界除二二有肝膽重義氣者外其餘均憐于陳藩司之惡勢畏蕙不敢捐輸總計共得五百金日暮途遠得此義助真如涸鮒得西江之水感謝莫名因共議備辦旅用各物如羅鍋帳篷爲必不可少之物因出嘉峪關後雖至宿站並無旅店或有店亦無住房故必自帶帳篷夜間張起住宿羅鍋爲罐式之銅鍋行沙漠中無從覓購食物可以石子壘一行灶駕羅鍋于上即可造飯嗣因車中可以住宿遂免購帳篷只備羅鍋兩隻又以三十五金買車一輛三十五金定製車篷一具七十餘金購茶葉一箱三十金購紅棗兩箱又購灘羊皮袍筩三襲

甘省產灘

羊最著毛長二寸餘曲如細珠輕而且暖上品外褂每件重量不滿一斤價值甚昂

以備到新省送禮購土產貨物數箱爲墊車之用

余與兩解委一僕人一厨役共計五人須備足兩個月之糧食菜蔬爲數亦不在少計議已定即托雲王二君代爲購辦午飯後發家函又致津友王君劭廉李君子久

各一函致謝西安德珍齋古玩莊劉德泉及諸同鄉一函下午解委折君來云要求
臬憲加給一車須上一稟隨即叙稟交折君代上晚間同鄉劉君林讓介見河南程
君縉卿及恒益號同鄉宋君靜山暢談甚歡晚餐後飭僕人收拾行裝

二十八日 早王子元兄雲倬樵表弟偕來照料裝車代備食物極爲完備如白米小米
白麪均以罈裝米麪中附藏雞卵數百枚既不佔地又免磕碰思想周到之至又有
醃肉鹹魚臘腸火腿洋酒海參熏雞滷鴨鹹菜等物可謂應有盡有周到之至因思
及柳柳州韓昌黎蘇東坡諸大賢昔均貶謫邊陲以視余今日自奉之優相去當不
可以道里計余何人斯暴殄奚甚愧對昔賢捫心增疚而王子元兄與雲倬樵表弟
熱心愛護尤深銘感飯後朱君景平侯君崑源來爲余介紹在新經商之同鄉周君
下午松魏二君來各贈路菜多品旅甘兩湖兩等學堂堂長劉君書元四川譚君齋
陶來訪譚君英年幹練人極開通在甘肅省垣創設礮石書報社以開風氣當與縱
談時局知甘省大吏仍抱愚民政策所謂興辦教育不過敷衍門面有名無實學堂

除陸軍與師範外小學一處未立所謂讀書人者只知吸鴉片其餘一概不知令人
慨歎李子珠兄來送行並贈路菜多品王子元兄雲倬樵表弟來送一品鍋餞行遂
留來賓共餐暢談痛飲賓主盡歡連日兩日時覺昏花服和肝降火之劑無効蓋病
在腦筋非關臟腑經此剝折辛勞或恐成爲廢疾甚憂之

二十九日 早晨新泰興洋行侯君崑源送來程儀十金及點心路菜多品陝委松魏二
君來送行留共午飡午後雲倬樵表弟王子元君譚君癩陶均來送行譚君並贈小

說數種程儀數兩李子珠兄親餽茶膏云服之清心明目解委折君介紹其同學曹

君之隼字古馨
延川人白君廷勛字少餘
鄭州人來訪朱君景平亦至子珠兄詢問納妾事已否辦妥

倬樵表弟報告曾談妥趙姓孀婦因不願遠行作罷行期迫促不及另爲物色子珠
兄遂建議由在座諸同好集資百金交與折解委即托折君於過涼州時代爲覓一

佳麗涼州產美女賣
女之風甚盛諸友均贊同子珠兄願任五十金雲表弟王子元朱景平折少蘭

四人各任十金松君任六金魏君任四金百金之數頃刻集成折君少蘭與于君右

任爲關中書院同學爲人頗有風骨當受在座諸君之托慨允負責辦成絕不辱命
余堅辭不獲惟有領情拜謝而已余此次遣戍所遇各省解委咸蒙熱心維助是固
天佑愚衷默加呵護然汙官場豈盡皆齷齪兒哉下午車始催至然時晏不能成
行晚間倬樵表弟又與王子元兄來送到借款五十金暫記李笏臣表弟名下歸還
因同鄉捐助之款盡購食用物品所餘無幾故再借五十金爲不虞之備耳致天津
諮議局及商會電報迄無復音想爲當局者檢查扣留矣大吏局量褊狹令人恨恨
今日午前聞旅店外有鑼鼓聲出視爲送殯者大致與北方相同前導有銘旌高
不滿五六尺和尚三四人引一官轎後爲喇嘛三五人及親友之執紼者孝子扶
靈輻而行哭甚哀靈後孝眷車隨送皆麻冠服極哀慟純樸之風猶存古意

三十日 晨興本擬起程因車篷尙未製好不得已又耽延一日因約松魏二君來寓午
餐午後解委折恩二君將行李送來王子元兄來照料裝車聞甘肅勸業道潘齡臯
觀察所創之工藝局出品優良未獲參觀托雲表弟代購活腿小桌及皮馬札各一

件

甘肅回民多牧羊漢民則猪羊並畜惟牧時猪羊各爲一羣牧猪奴一人手執丈餘長鞭背負飼猪籬別無他物牧羊則不然牧者一人必携駿犬二三頭爲助行時一犬引路餘犬兩旁夾行若糾察然秩序不紊路遇野獸則三四犬共鬥猙獰異常雖豺狼見之亦遠避

二月初一日 早十時由蘭州慶陞旅店登車起程（車計三輛余獨乘一輛兩解委共一輛僕人及厨司一輛車之製法與他處不同以兩木爲轆直通車後坐人處平鋪橫木約十根上無車篷下無車箱以衣物箱墊二尺高爲車底再鋪坐褥以便坐人自製一篷按于其上其寬大如一小屋可容五六人坐而聚餐車篷前裝小榻開門兩扇以通出入車甚高非梯不能上下出嘉峪關後即在車上住宿）同鄉朱景平張子明王子元劉林讓周聚才諸君及雲倬樵表弟均親到送行並欲送至十里鋪余再三堅辭始各珍重而別開車出北關即過黃河鐵橋（橋身甚長當中行車兩

邊行人橋之中心宛如天津之新橋河面寬三十六丈水色淡黃兩岸結冰均丈餘厚一過橋即北塔山山上殿宇參差寶塔高矗入雲山坡房屋疎密有致遠望宛若畫圖西行數武即入旅店宿焉因車篷尙未做好行裝亦未完全而官府催迫上道急如星火不得先行故先出城守候（官家發給官車一輛有車無篷必須自做車篷每具價銀三十五兩至甘省之有官車聞係左宗棠西征回亂時因交通不便商民艱苦特設官車局置車百輛發給民人應用每年應官差一次然仍給官價或百兩或八十兩）下午出店遊覽遠望黃河北岸即北塔山山下一帶皆鋪戶南岸即省垣望之如長城城關相連關大城小東南西三關相連城後羣山環繞南門外爲五泉山遙見廟宇頗多每屆夏秋之間官紳咸往遊覽甘肅省垣枕山帶河頗占形勝洵西北之重鎮也晚餐後同兩解委散步街頭見有十數人項下各掛一長鼓其形如枕以槌擊鼓又有數人敲鑼祇一音調其狀蠻悍余等因隨行其後入旅店右首之小巷路中設一方桌上置饅首香爐一道人傍坐擊磬棹後設一椅椅上置一

草人高數尺詢之士人云係地藏王菩薩男女焚香禮拜者甚衆神座對面搭一小戲台演唱迷虎子與北方之十不全地秧歌蹦蹦戲相類北關距城咫尺而風俗樸野與城內相去天淵婦女來看戲者甚多俗尙小脚而率多僞飾以四寸長之銅管或竹管爲之銅者名銅溜子竹者名竹溜子套至脚面裝直而以足指着地行走視其挪動之艱極堪憐憫聞甘省之諮議局毫無生氣男女學堂皆不提倡祇兩湖會館設一兩湖客籍兩等小學堂別無所聞報館及天足會等則更談不到矣自秦火以後文化東漸隴中僻處邊陲退化日甚迄于目今已達零度倘再無振而起之者則將來必仍恢復原始時代之情狀思之可懼甘肅之廟宇皆名曰宮如三清宮三聖宮關帝宮火神宮等無庵觀寺院之稱蘭州產烟葉水烟最著又產一種松木專作盛水烟之木箱木質鬆軟與日本之火柴木無異此種松木聞甘新寧夏青海等處均有用途甚廣而無知者我國實業家需用此種木料時轉取給于異國家有寶藏而不知開發良可嘆也雲倬樵表弟現任甘肅商會副會長因函告之囑其竭力

提倡

初二日 早六時興僕人等亦甫起身未及盥漱乃信步出店至黃河邊呼吸空氣旅店即在

河順路西行見岸邊山坡上有一廟宇層樓疊閣建築精巧行至廟前見額題金山

寺蘭州即漢之金城寺西為金城關前甘督楊昌濬重修寺前河心有積沙一邱水阻流激濤聲清澈寺東有小門

題吉祥園余遊興勃發遂入廟棟宇巍峩曲廊繚繞西行為福德園入園北上石磴

約二十餘級有關帝殿東轉為大雄寶殿再東前坡為財神殿後為火神殿直上山

巔有八角亭亭前磚牆圍護亭中懸匾一方題眼光四射四字俯瞰對岸雉堞蜿蜒

樓台如畫對岸即蘭州城城關相連宛延數里如長蛇甘省無樓房所謂樓台者四門城樓與城中之鼓樓耳東望黃河鐵橋甚渺小橋柱以洋

灰為之橋上鐵欄五段高約二丈河流甚緩兩岸冰結如雪山聞未建鐵橋之前冬令河心結冰地方官飭船夫用

烙鐵熨平即可通行車馬開河後以鐵索連虎頭船二十餘隻為浮橋以利交通西望南關有橋一道如長虹附郭山村鱗次櫛比

遠眺五泉山宛在目前惜以山嵐未消不能十分清楚耳因欲登程未敢留戀遂下

山回旅店早餐八時登車沿黃河岸前進兩岸菓樹成行道旁多菜畦行十里經十

里店子及二十里鋪入沙溝口從此北行入山不復見黃河矣又行二十里至朱家井宿焉晚餐後同一解委至街頭散步見鋪面二十餘家鑿井三眼惟住戶甚少街東有關帝廟甚整齊詢之士人此處何以不見書館答云無處請教師離省城纔四十里耳即如此荒陋不知悞却多少青年佳子弟矣此處既無私塾遑論學堂至于巡警局除省城略具雛形外省東各州縣尙虛掛一牌西北各州縣則并此虛幌子而無之如此新政可爲一歎

初三日 早六時由朱家井起身行走山邊路寬處尙不危險行約三十里上一土嶺甚高俯視峽中小山叢集多紅色其狀宛如蒙養院之蒙養生羣聚嬉遊山高者如保姆余視之心神怡然下坡過余家灣又五里至小澗池午尖該處住戶約二十家多以開小店鋪爲生每家門旁掘一水窖深約三四尺窖旁通一溝引注雨雪水入窖備爲飲料據土人云地脈甚高三十五丈以下方見水以故鑿井不易取水甚難又路經一家院內有婦人向陽爲一十二三歲之女孩櫛髮時值嚴寒尙赤下體殊爲

駭怪後聞知甘省風俗男女小孩多赤下體若貧寒之家則小孩身無寸縷至十五歲後始着衣褲亦陋俗也尖後行十里至苦水停車買茶飲之地名苦水而水並不甚苦又二十餘里至鹽水河住宿此處水鹹而貴余因體諒店主誠僕役不准洗面飯後渴甚烹茶一壺水鹹不能下咽駕車牲口亦不飲因口渴乃加梨棗於水冀減鹹味然仍不能解以渴極強飲三杯折君仍飭价煮茶店主不許余允以多加茶錢一兩店主忽來求見跪地哀懇大人恩典不止余問何事店主云此地每日水有定量如多用而雨水不至則須逃荒且大人過境所用之水均爲例外不在預計之中余始恍然力誠車夫僕役不准用水店主始叩謝而去飯後奇渴而腹大脹恐生疾病遂破戒吸鴉片一口烟爲恩君所帶渴則食自帶之川橘及本地出產之凍梨梨甚輕故又名軟梨以代茶水此站最苦行路者皆想躲避奈非尖站即宿站無法繞越也

初四日 早七時自鹽水河起程三十里至紅城堡午尖該堡街道整齊商務以鼓樓東爲最繁盛烟戶約數百家飯後與折委閑步街市見街西有古晉會館建築宏壯街

中舖面房屋空閒者甚多詢之山西店舖據云日前祇賸西幫五家零落已甚想昔
年左文襄西征軍務倥傯之時昔人在該鎮貿易者必多故有此宏敞之會館也街
南有一老縉紳家龍姓門懸道咸間科第匾額又建有旌表節孝坊兩座西行有廟
宇旁一小門懸義學豎牌因入廟參觀見老祖殿上有學生四五人壁粘功課表已
改爲兩等學堂內有一十四五歲之龍姓學生語言行動頗安詳而有禮貌又登樓
一覽即回店起程一路均行峽中中有小溪農民均利用此水澆灌田地四望多水
磨頗似江南風景所不同者水淺無舟天氣嚴寒耳森林亦多行四十里經過徐家
磨及青溪至大同鎮宿焉下車後至街頭閒步至一關帝廟正值演劇觀小戲一齣
饒頗興趣晚十時寢

初五日 晨興見雪花滿地厚已寸許登程後觀望山村雪景頗快胸臆行二十五里過

滿營城郭完整又五里至平番縣

即古之番地距縣治
數十里番漢雜居

東關旅舍宿焉午後至街市見

耍獅子唱秧歌大頭和尚等又有十數兒童古裝騎紙馬遊行又有跑旱船船中坐

一旗裝婦人所經商店均焚香燃爆竹歡迎並以棗子二碟錢二三百文酬之信步

至街西新泰祥洋行同鄉張華廷君處拜訪談甚久回店已五時矣

平番縣出窩麪其形如豆中有一窩

熟肉爲渣塞窩內可作路菜因購數斤

初六日 早九時在平番縣坐尖起身行三十里至武勝驛午尖一路多山徑幸無險道

又行四十里大風極寒冷掌燈後始至岔口驛宿焉由此西進愈行愈冷矣

平番縣一帶約數百里皆西番民聚居之區人口多少無統計設有莊浪茶馬監

督管轄駐平番縣城內

此沿前明遺制漢商以茶葉換蒙人之馬

番民居深山後設帳篷爲房屋崇奉佛

教故有佛旂族旂之別分族而居有首領管理各旂事務專種大麥名青顆尙工

藝產褐子以羊毛線織成及嗜嚙栽絨氈等兼能造數響之洋槍製法精巧名水

磨炮在水中以人工磨成皆有螺絲釘惜當道者無人注意耳又有黃油奶餅奶

油等物出產甚多

土俗十五歲以內之男女孩無論冬夏均赤下體婦人天癸至以棉絮堵塞每至

秋收婦女亦下田工作襜中時見紅潮殊不雅觀 又甘省北境之綠營腐敗不

堪每日派來護送營兵一二人服裝襤褸腋下夾木棍一根不知者以為乞丐也

初七日 早七時餘由岔口驛起程出官店

各驛均設有官店兼寓客商

過溪河有寒冰四五處不易行

走過河上灘路中鵝卵石密布車行其上顛播異常頭暈眼花苦楚萬狀山中瘴氣

甚大據云烟酒可辟車前見喜馬拉雅山之支峯高插雲際峰頭積雪終年不化六

月間雖有雪亦融注下流然山頭積雪仍然不變山上樹木甚多奇花異卉種類甚

繁又有雪蓮花採握手中頃刻即萎蓋產于寒地不能見熱也行五十里至鎮羌驛

午尖飯後開車過岔口河河面極寬

六月間河水始融山水暴漲河流極大而山石被水冲刷下流入河中亂滾往來車馬往往被阻至十餘日不能過渡

寒風大作行石灘路約十里上烏梢嶺

該嶺雖六月亦寒冷異常時飛雪花嶺前後一帶地方有風即結冰六月亦然

雪花飄舞

係由喜馬拉雅山飛下者

嚴寒刺骨

車篷外簾內氈車門關閉身著大毛袍披狐皮斗篷猶寒冷難禁周身戰慄

嶺脊約五六里連上下坡總計

約在二十餘里嶺巔有居民兩三戶

嶺上六月雪融八月結冰居民已習慣自然不覺其苦矣

又有韓湘子廟下坡

後又行數里已昏黑不辨路徑始至安遠營宿焉店主馬姓人極開通據云該處時

有回漢匪人結夥行劫用火燒事主手指及種種慘無人道之方法以勒索財物曾請求武營派兵下夜附近三兩站水土皆劣夜中寒甚不得安臥

初八日 早七時半由安遠營起程出店門即望見喜馬拉雅山支峯如在目前詢之士人據云尙在一二百里之外途中石子密布非常難行兩面山皆朱色行十五里至龍溝堡午尖飯後起程又過一大水河經黑松堡古浪峽據土人云昔楊家十二孀婦被西番兵圍困全軍覆沒即在此峽峽中有小溪溪水逆流詢之車夫據云係由烏梢嶺流出之水逆行直至肅州而止峽甚窄狹兩山無路此車道不知何年所開崎嶇多險難走非常山麓怪石嵯峨若飛若舞又行四十五里至古浪縣之西關旅舍宿焉

初九日 晨在古浪縣坐尖十時起程行三十里至雙塔堡茶尖與恩解委借臨街藥舖小坐茶後又行三十里至靖邊驛城內宿焉該驛即恩解委轄地恩君所駐衙署在涼州南山內之張義堡距此尙有五十里下車後即與恩折兩君遊覽街市見有旅

店三四家雜貨舖兩家西行有驛站公館及經制衙署惟住戶祇有數家城樓上有一廟大殿兩層登臨遠眺見土城內住戶寥若晨星荒涼殊甚據聞從前頗稱繁盛自經回匪之亂燒殺搶掠一空迄未恢復由堡子南望雪山如長堤即涼州之南山所謂中崑崙山脈是也北望平川千里土人諺語云「北望黃沙一片」渺無人烟亦從無前往探險者長此荒蕪殊可惜也

初十日 在靖邊營休息一日緣該處爲解委恩君秋圃之轄境恩君押解至此爲止竭誠挽留作盡日之歡藉申地主之誼情不可却暫駐征驂早飯後與恩折二君至郊

外遠眺遙見南山積雪山麓斷壁頽垣

亦回亂所毀

信步北行見西向一廟額題三元宮

廟內有小兒讀書聲因歎關入見殿前南牆下有村童數人圍一桌聚讀有坐者有立者北牆下有一老學究據一案案頭置時文窗課二冊及選抄唐詩一冊牆外小院中亦有五六村童共一小桌坐地誦讀殿內又有三五孩童站立而讀學生各持木油粉牌抄三字經衣履多襤褸形同乞丐詢知老學究姓滿名學謙光緒十三年

入泮亦饜門之秀士也轉詢余是何官職余告以並非官府復問余是否查學堂者又云國家廢八股尙可然詩賦甚好何以并此而不予保存余以語言不甚相通姑漫應之老學究又問國家禁鴉片是否實行甘省地寒種植他物多不相宜國家果厲禁鴉片則甘民將有餓斃之虞余告以鴉片之害及英國人將來之干涉務必普勸鄉民勿種烟苗致妨大局（甘涼一帶夙爲產烟之區聞自政府發布禁令之後涼州人民聚衆圍城要求免拔烟苗經官府再四開導圍仍不解官兵遂開鎗擊傷六七人幾激大變聞今年人民仍死力抵抗長制軍已派遣馬隊至涼甘一帶彈壓沿途曉諭禁種鴉片但種戶吸戶依然如故甘省之政治民情如此改革殊非易易也）正談論間忽聞鴉片之味觸鼻細察四周並無烟具惟老學究之手指烟漬如墨其程度之高資格之老概可想見矣余詢其每年館穀如何據云學生二十餘人每年共酬米穀七八石亦云苦矣晚間恩君借經制署設筵餞別在本地覓一庖丁烹調尙適口談至九時餘始回寓休息

十一日 晨起偕恩折二君至汛署喫餛飩兼與恩君話別恩君情誼甚篤相對凄然所謂黯然銷魂者惟別而已矣當時之情景似之握手淚下珍重登車行四十里至大河驛午尖又行三十里四時餘至涼州府城之東關泰來店宿焉是日所經一路石子皆爲南山融雪冲下者年久積聚密而且厚人行亦須擇路車行倍覺艱苦晚間擬安家電報擬請折君轉懇涼州道代爲拍發因張觀察名翼字仁甫係同鄉故敢冒昧懇求詎意折君至署張飭閹人詢明情由攔駕不見毫無關照之意此富貴人之常態無足深怪晚間涼州府王太尊名仙洲字步瀛陝西人翰林出身由御史外放江蘇常州府調任甘肅涼州府發起傳知直東同鄉捐助路費熱心令人感佩據土人云涼州府署即漢馬騰之府參將署即韓遂之府確否俟考

十二日 在涼州休息服藥午前寫南京家信又致蘭州同鄉諸君函心緒不寧肝火大發憤懣煩躁腦筋與心氣大傷百病因而叢集在蘭州時陝甘各解委及諸同鄉咸勸納妾隨行並集資委托折君過涼州時代爲辦理故折君于午後出外進行有張

與折君赴同鄉王君振山之約同席有同鄉張君春堂李君蘭亭及韓牛二君食家鄉之雜色包餃暢談甚快王振山君並述說當年回番張嘯爾白眼虎等作亂情形甚詳並云回民有黑教白教華教三教之別互相仇視各不相下又談及奉直東三省義園成立皆王君振山一手創成惜經常費無出請遇機幫助余允以到新後竭力設法

十五日 黎明即起因肝氣發作一夜未眠忽聞洋號聲急出視知爲岳軍門往迎蘭州派來彈壓剷拔烟苗之防營馬軍門者道署啓席董君儀臣送來一函內附致新省學署同鄉李君夢陽一函切托關照良友熱忱令人銘感午後有媒媪送來胡姓女身短髮疏人尙溫順因以百二十金納焉晚間王君振山送來點心此老待人真誠可愛又王太尊請到署喫元宵因病托折君代爲辭謝

十六日 肝氣澎脹徹夜不眠晨興絕早十數日來因道路難行水土惡劣加以各處大吏之惡氣念母之心情幾日日以眼淚洗面因之眠食大減精神委頓深慮積思成

疾因又破戒稍吸鴉片以止肝氣上犯午後發張義堡恩都闖一函傍晚胡氏妾來厲命名小梅當共折君一同晚餐夜間腹痛泄瀉兩次蓋寒火凝結之所致也

張義堡冰山中產金線狨俗呼金線猴又名金絲猴毛長半尺有餘專食猴腦猴若遇狨則自行洗腦漱胃俯首貼耳靜候狨食是豈物性之相制歟

十七日 早九時由涼州起程繞東北城根見叢葬累累墳皆以石子五六層堆砌成邱回民墳爲平頂墳前凹入一門村莊房屋多以紅綠鵝卵石爲牆一層石子夾土一層均作人字形極美觀聞雨後尤鮮艷奪目土質堅硬故雨後亦無泥濘沿途無大村落約相隔半里即有一土圍中有角樓及瞭望台台極高爲防盜賊之用土地多平原皆腴田惜率皆種植罌粟甘涼所產鴉片質地極佳烟灰能燒至十八次故土人名之爲十八翻男女嬰兒多有吸者民多殷富男子衣紅棉襖着羊皮鞋（無底無邊）婦女多以羊毛氈作護膝膝行者（因纏足者皆裝假腳不良於行之故）身着背心而綴一黃布印符以辟邪崇迷信太甚改革殊非易事行四十里至四十

里堡午尖晚宿豐樂堡是日共行七十里一路皆石子大者如甕小亦盈尺車行其下顛頓異常頭暈目眩臟腑震撼欲裂屢屬車夫稍停而無處可住痛苦萬狀無怪古人歌行路難非身歷其境者不能知此中之苦况也

十八日 早六時起身是日因有石子路程九十里故開車較早行三十里至八壩尖晚宿永昌縣城內旅店中數日來綠營護送之馬步兵丁均已盡撤只一縣差及綠營一乞丐兵挾木棍狼狽隨行而已

甘省產羊皮以寧夏爲最優永昌次之

十九日 早八時由永昌縣起程大風出城後即行土原中含二三尺大之石子顛播二十餘里始上土路又三十里至水磨關尖此處只店舖數十家食物無購處因將自備之掛麪雞蛋取出煮以充飢地方極苦房屋皆以樹枝樹葉爲頂簡陋之至馬糞臭氣薰人欲嘔兩月所經各地率皆如此殊碍衛生然無法避免也又行五十里至水泉營宿焉下午所行多沙邱石嶺幸不甚險惟崎嶇難行耳水泉營築有土城在

高原上甚寒冷據店主云一年四季皆須披裘因原上風寒故也三日來所宿店房皆有炕蓆

蓆以濟急草織成甘人呼之爲芨芨草遍地皆是類北方之馬牙草無節土人以之編織蓆屢行旅過此燃草禦寒以濟急用故以得名

房屋雖亦無窗然

並不十分黑暗馬糞氣亦稍減較諸陝之北山甘之東南生活優勝多矣

二十日 早六時動身風仍未息行高原上三十里雖有碎石尙不碍路兩面高山中爲大原一望無際惟渺無人烟直至三十里之穆家廟始見住戶數家一二小店舖而已又行土路十餘里入一山峽峽口甚難行峽中亦有石片石塊幸無大碍約四五里出峽至峽口堡尖飯前共行五十里尖後又行五十餘里一路平原車行甚穩僅過二三小土嶺亦不甚顛播掌燈後始至新河子宿焉是日風冷困乏異常

二十一日 早八時由新河子起程出店見街市整齊人物清秀街外有一河繞村溝汊紛歧人烟稠密田多種稻地近甘州素稱產米之區傍山多樹率皆白柳行四十里至丹山縣尖縣令送酒席一筵城內有大街河道穿城而出男婦皆清秀非復前數站之面目黧黑囚首垢面使人望而生畏矣人民生活與文化皆以山水爲區別地

利不能不講也尖後由丹山縣行十數里山坡有樓約十層中就山石鑿成大佛一尊法身十餘丈較涇河之石佛尤高大而築樓圍之亦大觀也惜以是日路程甚遠不敢耽延未獲參觀殊以爲憾又行三十里過一巨河水尙未曾盡解車由水上渡河甚險火食車竟傾入冰眼加三套馬始將車拉出耽延多時至掌燈後始達東樂分縣爲甘肅省第一優缺縣丞炳君北京旗籍款待甚優夜宿行館中睡板炕土炕中夾木板數塊炕中燒木炭石煤甚暖酣眠解乏

二十二日 早六時餘由東樂分縣起程見街市中有路燈之設備又有巡警教練所此甘省北路州縣所僅見亦一特色也出城一路黑沙兼有碎石行三十里至古城子尖飯後登車兩傍山村甚多樹木繁茂地多膏腴惜只種粟農事不講久矣行數里因農人放水澆田繞行阡陌間路極崎嶇約十餘里始上大道又四十里至甘州距城三五里道路低窪難走郭外有陝西義園及左文襄祠堂祠內附設小學及張掖甘省之古郡名宣講所旁有一廟門前古柳高數丈大數圍亦古物也城甚修整四城街

市整齊貿易繁盛南門至北門長街約四里一律搭蓋丈餘寬之雨廊

俗名雨搭此種設

備非特內地州縣所無即都市中亦所罕覩此爲關內四城之一洵大郡也惟所設警察學堂等亦有名無實虛掛一牌而已張掖縣爲余等代備行館於南街旅店因就宿焉

甘州產大米掛麪最著水仍逆流聞須直至肅州始止甘州南城根有古之甘泉惜匆促不及遊覽爲憾

二十三日 早聞甘州所屬五十四區鄉民因禁種罌粟聚衆二三萬於十二日進城將紳士王仙洲房屋拆毀該紳向充土捐委員多年積資逾萬遂龐然自大今又謀得查種罌粟委員已奉上憲札委更復目中無人意氣用事因而激怒鄉黨一發不制此事變之近因若遠因則在去歲大吏爲敷衍籌款對於種烟禁令忽緊忽弛嗣奉上諭始不得不認真辦理勒令盡拔烟苗改種五穀然烟苗業已長成收漿在即且農時已過無法下種少數懦弱者不敢不忍痛遵行強梁者則玩忽公令置若罔聞

官吏亦恐激成大變未敢操切去年收成極豐每畝收穫烟膏八十兩售價五六十

金強梁獲利懦弱被害中心積不能平遂有今年之團結而官吏又復辦理不善初

查出某鄉耆老

陝甘兩省人民之稍有財產者即到縣報捐耆老甘省此風尤盛三四十戶之鄉村必有懸耆老額者三五家額書一鄉飲耆賓一或一恩榮杖國一或一恩養耆賓一等字既成

耆老即可主張一鄉之事並設公案受理訟事且可用鞭刑事之小者耆老即可斷結事之大者則詳縣辦理耆老之權利如此他省實所罕觀又有隴官渠溝等名目及鄉民某某等三

人私種罌粟立即傳責枷號示衆詎知該耆老等皆年高而癡大枷押一二日遂致

脫癡病危比及迅速釋放一死于店一死于家屍屬遂將屍身抬置縣署二堂公案

之上經紳士出面調停由官府備棺厚殮並誦經超度始寢其事然各鄉乘此機會

鼓噪聚衆至府縣署索要王仙洲一時官眷逃避一空農民則任意搜索至十四日

鄉民之來城者愈聚愈衆又將鹽局拆毀

甘省向食硝鹽今設鹽局賣大錢五十餘文一斤嚴禁私硝因亦遷怒

鄉紳之在諮

議局允議員者家亦被毀有不出錢資助或違諭不種罌粟者亦毀其家其民情之

蠻悍有如此者擾攘數日後有要求非種烟苗不可者又有要求種糧免去錢糧者

錢糧每畝地計二百四十弓按一斗種封一斗糧辦理未免太重聞腴田收不到七八斗亦有祇收三四斗者因種烟之利倍蓰于種糧故也政府縱容

多年業已成習今一旦急于矯正礙及人民生計此政府之過不能盡責鄉民也後經馬軍門帶隊出城向民衆勸解允代轉請大憲豁免錢糧衆始解散然數萬農民已齧集城內三晝夜矣適新簡之巡警道趙支山觀察由新疆查辦烟苗回省經過此處特留住辦理此案聞亦無甚妥善方法余遂托折解委昔謁趙觀察告以人民之隱情頗蒙嘉納當承告以前途開漿行走不易並屬諸凡珍重趙觀察係翰林出身在甘頗著政聲良吏也是日早點後作家書一寄甯一寄津午後出門訪同鄉聚利洋行甯筱帆兄禮和洋行張子坡兄順興永高孝先兄談鄉情甚久晚間各同鄉來送行並贈程儀掛麪臘肉等物直談至二更餘始散

甘州人民殷富渠水縱橫土地肥沃

二十四日 早晨滿擬起行因車夫與趙觀察坐來之肅州車夫互換裝幀故又停留一日午間與旅甘同鄉高鳳宜沈廷政及河間諸同鄉（皆販京貨者）閒話鄉情晚作書一致蘭州雲倬樵一致武清李笏臣徐紹棠諸表弟

二十五日 早七時餘由甘州府起程出西關里許即鵝卵石灘有山水數道又有水蕩一片周約三四里冰雪未融行二十里至崖子始出灘路幸無大石尙不甚苦過崖子上一沙嶺嶺不甚高沙土約半尺厚下嶺至沙井驛計程約三十里午尖該驛居民僅二十餘家旅店中食用等一物不備俗名乾店燒飯皆用馬糞飯後起行路尙平穩所經村堡亦整齊見有木架二層角樓建築精巧樹木繁盛該處與南山相距咫尺而人民生活則天地懸殊又行二十里至沙河堡又名梨園營宿焉旅舍房屋寬大窗榻心皆飾以書畫炕上有炕罩房前有大罩棚約二丈餘雖構造不甚精工然經過豫陝甘三省所住店房當以此爲第一堡中住戶不過百家當典大雜貨舖及肉舖等皆備最奇者有一舖兼售豬羊肉二種者甘肅曾有一家此地再見該處舊堡外又加一套堡出堡卽梨園之住戶鱗次櫛比極其稠密

二十六日 早七時由沙河堡起程因撫彝廳大道有水難行遂繞道南山麓行三十里至威狄堡午尖該處住戶店舖數十家氣象繁盛飯後出堡一二里即見南山高矗

天外日光斜照山頭積雪片片如白雲山麓沙邱無數途中積沙盈尺三十里外始見樹木人家又經沙灘十餘里至高台縣已黃昏矣路見墳塋甚多每叢五七座不等墳前有石碑土製供桌左右有焚化冥紙爐迎面影壁壁上有開月洞者墳有圓頂者亦有瓶式及壺式者不知何故豈俗尙然歟旅舍在城內後街西首人家有懸文元及進士匾額者該縣文風想尙可觀晚間折解委之僕自撫彝歸報告張司馬

名瀛學字紫瓊四川人

已備行館歡迎候三日矣蓋余出蘭州時彝石書社主人譚彝陶君函告

張司馬及其西席黃宗典君

字徽五四川人

故也譚君與張黃二君有鄉誼皆思想新穎熱

心愛國之士張公於元宵後由省垣來此履新曾面托譚君余起程時即專函通知情誼殷摯良深銘感惜以道阻於水以致緣慳一面悵惘久之

二十七日 早七時由高台縣起程因大路泥濘仍循南山麓小道出城四五里沙灘一望無際地面鹽鹼約厚寸餘一路渺無人烟車夫不識道路繞行五十餘里四時始至山崖下有土房四間名高崖子僅一老叟賣茶據云其水係由三十里外山澗中

挑來之冰塊人畜同處一室糞穢徧地臭不可聞余等自早晨直至下午湯水未進
飢渴交加於是大嚼自帶之乾糧亦不能計屋內之穢惡矣飯後又行二三十里多
黑沙土嶺仍無人烟祇見狼三頭鴻雁一行而已黃昏時橫過南山一嶺不高而長
在山谷中盤旋二十餘里始至源山子村時鐘已九指矣今日所行皆山道石路顛
頓異常遍身不勝痛楚手腕因在車中撐拄以致腫痛兩足酸麻不能下車一時肝
熾腦炎暴躁火發乃掌攔車夫兩頰痛加責罵因起行時曾屬車夫僱人引路彼未
曾遵從以致多繞數十里山路受此苦楚也該村人家數十戶生活平常飲料亦劣
蓋南山一帶皆飲老壩水

甘省之東皆爲澇池
即北地之死水坑也

牲畜亦就飲池中異常污穢飲後則肚

腹澎脹然舍此別無他水明知如此亦不得不飲真苦極矣

二十八日 因昨日疲勞太過晨興較晏九時始由源山子起身一路荒原沙嶺渺無人
跡但見野羊三五成羣遊行原上其形如驢色黃頭長腿細面白尾黑而短如棒槌
尾下有白毛一片其圓如月見車即奔避迅捷如鹿行五十里已至午後三時始見

樹木人烟約有人家數十戶店房三處地名馬營因停車宿焉食物無購處因將自備之雞蛋掛麪取出煮以充飢今日僅得一餐飯後即寢夜夢桐君妻隨侍老母召余歸家方談數語即醒

二十九日 早六時由馬營起身出門見牧童驅山羊一羣經過內一老白山羊毛長盈尺若置諸北京之萬牲園亦一奇品也一路遇老叟皆挾羊毛一團撚線詢知爲織裕子之用甘省土人皆衣裕子粗者再襯羊皮爲衣奇暖北京官場中所着之雨衣即此物也聞西寧番子所織者尤精細行三十里至清水營午尖飯後又行三十里至上河清宿焉兩日來解委折少蘭兄小疾余亦不適蓋石路顛頓過勞所致故今日停車較早藉資休息

三月初一日 早七時由上河清起程行四十里至同金營日堡午尖該堡有一廟內設私塾飯後步入參觀教師馬姓人尙和平學生約四十餘人廟中塑像畫壁均甚精細壁上粘首事者之諭帖云「每渠放水一分限交芟芟草二百斤」出廟登車又

行二十里至敦載浦宿焉

初二日 由敦載浦起程行三十里至肅州進南關至東關大街大公館停車城內人烟

稠密貿易繁盛爲出關之第一要區州尊恩公預備極周到晚間又送酒筵一席飯

後至順興永京貨號拜訪同鄉王雲陞

余過蘭州時雲倬樵表弟即函托照拂

遇同鄉張君連瑛

字善修永平人在蘭

州游幕住蘭州木塔巷刻由口外野蘇灣釐金局回省

談至夜深始歸寢

甘省不產棉坐褥椅墊等皆裝草代棉

初三日 早同鄉王雲陞韓壽田二君來訪並面邀至順興永京貨號便飯喫家鄉鍋貼

餃傾談甚暢飯後電致蘭州雲倬樵表弟借旅費晚間擬作家書日痛不果遂休息

初四日 早起日痛自擬藥方煎服稍愈原約王雲陞君至東門外遊覽酒泉

肅州即漢之酒泉郡

目疾未果午後至復聚源酒店回拜同鄉韓君壽田又訪天津春茂和皮莊楊君濟

卿暢談甚久歸廬後有同鄉周君少卿現充該州吏目來拜楊濟卿送來燉煌梨八

枚味甜且嫩晚接雲倬樵表弟復電匯來二十金

初五日 早起作家書寄南京九弟及天津桐君妻楊君濟卿來廬暢談西北情形楊君

曾往來和闐崑崙一帶收買子玉多年風土人情知之甚詳據云新疆漢民少而纏

回多

均昔年左公
征服歸化者

回民知識淺陋愚而無信漢民以奴隸待之地方徵收錢糧柴炭極

其苛刻人民納糧二斗祇作八九升因過斗時差役故意撒米於斗外斗內者爲官

糧斗外者爲官差之盈餘每牛胎柴一担只算三斤若用驢胎則每担僅作半斤州

縣官大缺每年可得十萬或八萬次等缺亦四五萬天高皇帝遠黑暗之至楊君又

贈余唐寫經二冊係燉煌縣千佛洞中古物

燉煌距肅
州僅八站

楊君於數年前親到燉煌所得

余喜不自勝感謝之至又贈拆解委唐經一幅計長三尺尾書大中五年洵寶物也

晚間赴韓壽田楊濟卿王雲陞及中營守府王問卿諸君之約假飯莊公

餞飯莊名挂
爐老局招

牌甚奇樓窗四啓陳設精緻所用器皿亦工細味頗適口六千里外得此局面非意料

之所及也同席有吏目周少卿君

順德府人

鎮署文案王優甫君

河南人

同鄉歡聚快樂之

至晚檢小說數種贈楊君濟卿以茶色掛麪等贈韓壽田王雲陞二君紅色補丸贈

王問卿君

初六日 晨起發蘭州雲倬樵表弟一函附桐君信托爲轉寄韓君壽田贈茶磚兩塊酒

二饅午間州尊恩公來拜

名光字裕如京旗人查烟始歸

攆駕未見張連理君來談遂同赴順興永王

雲陞君處晚餐喫家鄉之炸醬麪飯後閒談王雲陞君述鄉人在甘貿易之困苦余

以時代不同應積極從事改進發展海外貿易當告知天津嚴範孫侍郎發起海外

工商圖進會已經組成公司將來或與合作或另組織又高陽李文正公之哲嗣李

石曾君在法國組大豆公司獲利甚豐閣座傾聽頗爲注意余又詢燉煌縣發現藏

經古洞之經過王雲陞君在燉煌貿易多年知之甚詳據云事在光緒二十八年燉

煌縣千佛洞之山岩忽然崩裂現一大洞日久又露出數小洞山有廟廟中有司香

火之道士該老道掘去蹋陷之土石忽見有極細白沙於是藏經之古洞現焉洞內

鋪白沙半尺許上置珍珠多粒經卷咸置沙上裹以白布

白布如天津所出之極粗湯布俗傳裹經之布可以催生束

以蔬繩爲數至夥經皆紙本楷書又有貝葉五色字之藏經經卷皆有木軸又有玉

軸牙籤者洞口石上刻唐大中五年尉遲敬德重修或謂唐玄奘法師自天竺取經
悉藏於此確否俟考然爲唐時藏經古洞則毫無疑義後有法國人白希利至燉煌
給道士香火銀十兩將洞中珍貴之品如貝葉經之類捆載以去計裝三四大車及
燉煌縣張大令聞知此事立即派人前往該洞查封由是喧傳中外宣統元年始奉
監國諭知甘督飭縣儘數解京同時復由學部嚴侍郎範孫派部員羅振玉到甘運
回十三車然珍奇寶物多爲法人竊取殆盡矣王雲陞君所得經卷已帶回武清原
籍未獲一覽晚落小雨覓雨具不得因甘肅終年雨水極稀無須雨具也僱車亦不
得余遂效甘人以布袱蒙首偕周少卿少尉冒雨而歸行至公館之胡同口始各分
途張善修君贈川資十金點心一匣

初七日 晨起日中紅翳大退早點後發西安段卜臣郭瑞甫二君一函又致陝委松龍

臣魏子生二君一函午飯後催僕人收拾車輛

至肅州後須另換專行沙漠車輛車輪特別長大且出關後夜行晝伏普通牲畜皆不慣也

王君雲陞又約遊酒泉爲雨所阻晚赴春茂和楊君濟卿之約座惟王君雲陞與折

君少蘭相陪而已席間楊君云其家在和闐崑崙山之下獲得玉石第一家採掘之權其地名有大小胡蘆地二處與崑崙山祇隔一水其水雖羽毛亦沈即古之弱水也山風猛烈不能建築房屋祇可搭蓆窩棚居住樹木皆高不盈尺楊君之三叔父在該處住居二十餘年迄尙未歸其堅忍之性情與冒險之精神良堪佩服致所採之玉計分三類一由崑崙山被水冲下之大石塊曰楂子石一較楂子石略小名山流水有帶皮與不帶皮之分即肆中所售之脂玉也有以此爲充玉子者最優即玉子係由崑崙

山爲水冲至對面沙灘中入土年久復又被水冲入河中其寶光甚大浮於水面故

採時多在夜間携一諸葛燈

其燈只一面透光且旋轉嚴閉可以自由

行至水邊即將燈光隱閉以便探採

一見水中有光則急以手探掏納入衣袋如仍然有光則再掏之期在必得而後已然經年累月未必一遇幸獲一枚其價千萬不等蓋大小不一也惟不能加以人工雕琢購者多爲外人飯後楊君出一匣取玉子一枚爲三角形狀如角黍長約四寸以一小水缸滿貯清水將室內燈燭盡滅迺將玉子納水缸中即有光透出水面取

出則光歛余親試之果然無不稱奇楊君云已有一英人願以三千五百金購買然非五千金不售也余得觀玉寶私慶眼福不淺談至夜半始歸寢時已逾十二鐘矣肅州地多膏腴溝渠縱橫街市整齊人烟稠密商各有幫典業皆高台人行店係山西人士貨爲陝西人京貨則直隸人熙來攘往轂擊肩摩較諸甘州繁盛多矣蓋肅州爲新疆之第一重要門戶距嘉峪關僅七十里來往客商必停息於此換車者置備出關食用物品者因之倍覺熱鬧惟土人多無信義視財如命欠債者多不願償還雖富厚之家亦復如是其俗欠債者如不肯還錢債權人即用麻繩或草繩繫負債者兩足如拖死狗狀遍遊四門遊畢則此債終生不還矣若負債者不勝苦痛中途求饒則仍須如數償還余進城時因覓旅店不得拆委飭价赴州署請代備行館停車街旁以待回音適有持繩索債者觀衆尾隨如蟻負債者始終不肯償還被債權人痛毆欲以繩索繫足經多人調解始勉允分期歸還此種陋俗將來必須改革此處婦女亦不甚重視貞操任意賣淫不以爲恥

初八日 早順興永京貨舖送來茶葉點心二色早飯後與折少蘭兄至各同鄉處道謝

辭行順訪酒泉古跡該處建築布置甚精樓台亦曲折有致係同治間左文襄重修

惜以年久失修房屋均殘破不堪酒泉在廳後以石闌界爲方丈之池水甚清中有

游魚池邊多青草亦以無人整理泉口爲沙石所淤水不上湧幾成死水坑矣泉外

水塘一片中有土堤一道圍繞酒泉堤上樹木夾道成行頗似西湖蘇堤風景惟地

勢較小耳距酒泉里許有一廟四圍荒塚纍纍是日爲清明節廟中賽神演劇觀者

如雲廟中趕會場賣食物者甚多婦女均據案大嚼雙目炯炯旁若無人觀其狀令

人捧腹歸寓後肅州道廷觀察名廷棟字普雲京旗人贈程儀二十金恩州尊贈程儀十金並致

意寬心養日又知照哈密一帶路稍不靖切須留意最好改行日站兩公厚意殷拳

關切之至楊君濟卿贈點心茶葉張君善修到寓暢談並贈肅州出產之玉石酒杯

六個

初九日 晨起約同鄉王雲陞韓壽田因事未到楊濟卿張善修諸君早餐藉以話別廷觀察

裕州尊王守府均差片送行午後車已換妥因由肅州赴新路站過大且十九沙漠
天晚開車夜間長行天明停車休息非但駕車牲畜一須更換即坐車亦須換八尺
高車輪者當即飭价收拾行裝雨雹一陣三時晚餐二時半登車北門道路難行
遂繞出南關附郭一帶阡陌相連田皆膏腴柳林一望無際時已三月中旬尙未發
青氣候之寒冷可知行沙灘中數里經溪流數道天黑宿於車中初行不慣顛播不
能熟睡久亦稍安行七十里至嘉峪關即唐之界牌關已將十二時矣旅店中寒冷而齷齪
因仍宿車中

初十日 八時始興該處住戶僅數十家異常荒涼點心無賣處候至十時早餐午間落

冰雹一陣稍頃微霽與折君少蘭出關遊覽荒涼滿目風沙撲面李陵答蘇武書中

所寫塞外情形信不虛也關門三重每重深約十丈洞門中陰風颯颯不禁增無限

悲感關牆以磚砌成然皆近百年來所修造求先秦遺跡渺不可得

聞當年修築長城起嘉峪關至山海關止

余與折君登沙坡上見關外三面皆高山環抱一面則雄關屹峙真有一夫當關萬

夫莫敵之概誠險要也回望關上城樓三層額書天下第一雄關寒風凜冽不可久

留即偕折君下坡經第二重關門在海關稅局內遇嘉峪關遊府雙君

字福堂
京旗人年七

十餘而精神矍鑠語言爽朗令人生敬晚雙遊府來送行並餽酒食然已飯罷僅領

菜二盤麪食一盤下午四時開車出關南北叢山圍繞中一大沙漠荒煙蔓草毫無

生意所謂八百里瀚海者此爲起點

左文襄西征時按站修官店一所以安行旅今則漸成村落矣

行四十里經山嶺兩

道因口渴甚覓得住戶一家因飭价叩門求水久之無應門者遂推門入闥無一人

有水缸而無水不得已忍渴前行又五十里一時半始至惠回堡休於旅店該堡有

住戶四五十家店舖數家軍塘一處

關外遞文書者
又名馬撥子

塘弁王姓其婦黨氏亦津人招待

甚殷堡外森林一片溪河一道荒山沙漠之中此景不易得也見之精神爲之一振

十一日 五時由惠回堡開車行三十里至火燒溝有軍塘一處人家四五而已又四十

里至赤金佛住戶亦祇四五家又行四十里至赤金峽已天明五時矣覓旅店休焉

距赤金佛三里名赤金堡該處人家有四五百戶又有遊擊駐一堡中居民多以

採取南山沙金與石油爲業油黑而稠專用膏車不知提煉故未知可作燃料據士人云油從泉中飄出數量甚多任人掬取赤金峽所產金與石油尤富惜當道者不知爲大利之源放棄至爲可惜

十二日 四時自赤金峽開車夜三時抵玉門縣即漢之玉門關班超平定西域封定遠

侯後以年老上書乞歸有臣不敢望到酒泉郡

即今甘肅

但願身入玉門關之語由古至

今皆以入關爲幸俗諺又云一出嘉峪關兩眼淚不乾蓋以塞外荒寒生活艱苦所致耳方今各國殖民拓邊不遺餘力吾人急起直追尙虞不及此種貪逸惡勞之思想實足阻礙發展當局者其留意及之玉門縣周彝璋大令四川人送酒筵一席臨行時縣署西席趙君季麟亦川人來訪談及提倡教育趙君云努力進行已非一日惜地方士紳無一響應者惟嘆末如之何耳

十三日 五時由玉門縣開車行五十里十一時至三道溝宿一路大風怒號余在關內時同鄉即告知關外一月中難得三天不刮風在關外遙望北山山麓村落參差樹

木葱鬱皆蘊靈秀之氣而南山則皆童山濯濯積雪終年荒寒之概使人望而生畏
三道溝尙有小市面住戶約百家蔬菜羊肉均有購處飲水亦好此處有同鄉宋君
承贈麪筋麪醬等物

十四日 五時半由三道溝開車夜四時餘始至布隆吉冰雪融化道路溼滑頗不易行

兩日來余與折君均感不適精神疲困皆由眠食失常所致布隆吉有土堡方圓約

數里景象荒涼堡中大街人家數十戶街旁有大楊樹數十株

土人呼爲白楊

均四五抱亦

古物也土人除種麥豆外即以種罌粟收漿或以子搾油爲大宗出產終年生活皆

仰給於此冬春賒用商家貨物名曰放帳統俟收漿

即烟土

後歸償行之已久相習成

風官家徵收錢糧每地種一斗收制錢八百文折收花漿四兩

以每兩二百文折價

北山蒙古人

則以畜羊售毛爲生

每年僅割一次故毛長

每百斤值銀十二兩生活情形亦漸進化多以米麥

爲食物至北山漢民生計仍仰給於罌粟雖官府認真查禁而狡滑奸民仍然私種

且有好回單人獨騎專爲運售將來罌粟果厲行禁絕則此輩人民生計必成問題

十五日 三時半由布隆吉開車兩日來體小不適關外風寒着重裘坐車門上觀覽塞上風景行三十里忽見滿天月影寒氣襲人車騎夜行萬籟無聲驀聞鴻雁哀鳴不禁悲從中來凄然欲涕既而轉念班超征西域左文襄征回匪建功立業青史留名氣又爲之一壯忽思及蘇武被困塞外牧羊爲活十九年始得放歸李陵被擄終身不得歸漢余今亦遣戍於此歸期何日一念至此幾至失聲一時萬念紛起心亂如麻至十時始因倦極而寢行九十里至小灣已深夜一時半矣該堡住戶只五六十家食用各物皆無購處遂取出自帶之米麪煮以充飢苦無燃料因命僕人及車夫分頭四出拾柴詎意一無所得空手而返惟有專候駕車牲口所下之糞以供炊爨耳

十六日 今日改行日站早餐後十時開車下午五時抵安西州覓店不得覓州官則以無錢供應避不敢見解委折少蘭兄不得已飭价傳到地保將大公館開封略事掃除始得休息之所幸免露宿稍頃州署送來宮燈桌圍等等原物璧還敬謝盛情而

已遂席地飲食因避供應嚇走州官亦一大笑話也安西州亦邊陲要地一路多沙邱距北山咫尺樹木多紅白柳人民不知造林任其叢生拳曲支離雖多而不適於用小樹甚多高不盈尺南北水渠一道村民用以灌溉以故稍得腴田該州有新舊兩城舊城已殘破不堪新城西北隅沙土堆積與城角相連接城內居民約二百餘戶四隅多空地荒涼滿目街市蕭條城中有鼓樓東西街道有舖戶二三十家鼓樓中心有一古泉圍以木欄上懸草龍二條泉名淵泉即古淵泉縣之舊址距城西數里爲蘇喇河八九月間河水漲發行人車馬皆不易渡往往有候至經月者而二月間春冰融化尤爲危險過渡車輛值上流水發人馬中渡被冲漂溺無蹤者時有所聞安西爲直隸州同城官吏除知州外又有武職協統駐紮於此惟所帶兵弁數僅百人無論邊警即或有土匪滋擾此區區者亦何濟於事要塞之設防如是其他政治更可想見矣聞該處爲邊缺中之最苦者知州每年進款最多亦不過二三千金而已固無怪其逃避供應也新政設施有電報局一處規模甚大因地處沙漠區域

甚廣遞送電信咸用駱駝故喂養甚多

十七日 早起無事因赴電報局探詢經過戈壁路程及應携食用物品據云安西至哈密共十一站皆沙漠每站除左文襄設立之官店外尙有私店二三家皆退伍之川楚兵弁所開設有携家眷者有借用廟宇爲店房者

十八日 晨興稍晏盥漱畢卽早餐午後發寧津兩廡函晚餐後與折君散步街頭見一廟內有一五十餘歲之老者教蒙童三十餘人無棹椅坐位咸在堦石上坐臥縱橫持書誦讀甘省之學塾皆如是其所造就者亦可想而知矣

十九日 終日無事看書破悶而已夜夢老母

二十日 早餐後致直隸自治總所李子久齊欒齋兩君一函午後三時起程出安西州

北門 距燉煌縣四站 四五里過蘇喇河河寬約十餘丈水不甚大然行至河心已及馬腹幸

河底沙土堅硬不致下陷過河二三百里有龍王廟一處四望皆黑石沙渺無邊際日光斜照蕩漾如波耀人眼目所謂瀚海者是也其中寸草不生行人絕跡夜半路多

顛頓詢之車夫知又行山峽中矣經一時許至白墩子停車宿焉該處只旅店三家軍塘一處每站例爲九十里然實則百三十里該處亦甚荒寂水須汲於半里外之上溝味尙可飲

二十一日 十二時由白墩子起身石路極平似在最高山坡之上行走遙望南北山峯密若犬牙皆不高大遠視石質片片如千層木色蒼碧可愛不意戈壁中有此靈秀之山行八十里九時至紅柳園該處官店一家私店及住戶各二家官塘一處郵差馬撥四人而已官店祇土房數間較私店略爲整齊店房無門窗以蓆遮蔽聊禦寒氣耳水味微鹹尙可飲

二十二日 晨醒已八時有餘天窗中日光直射面上甘肅店房無窗櫺閉門如黑洞多於屋頂開一竇以通天光至住戶有窗者亦以土坯堵

塞偶有一窗亦不過堅木三根一張破紙而已

開日四望牆上黑膏寸許厚

旅客在屋內炊煮烤火日久牆壁皆被薰黑屋頂凝膏欲滴灰塵蛛網如穀穗然飯

後一時半由紅柳園開車行數里入叢山中山石有五色者如錦屏然惜余非詩人倘李杜諸公過此必有佳作也行五十里至小泉祇一水泉並無人烟又三十里至

大泉已十一時矣是日體感不適未晚餐即就寢該處官私店三家小舖戶二家官塘一處

二十三日 午後二時由大泉開車一路黃沙經小嶺三八時餘至馬連井子宿焉該處旅店三家軍塘郵差兩處滿目荒涼惟水尙可飲耳此處仍屬甘肅邊界爲安西州轄境地寒宣統二年六月降雪凍斃七人距此僅半里許

二十四日 午後一時半由馬連井子開車經山嶺甚多路尙平坦惟大石嶺一道約三里稍覺崎嶇行八十里十時至猩猩峽宿焉附近石路稍顛播此處已入新境歸哈密廳管轄官店中窗以破簾遮蔽門則任其洞開私店兩家殘破尤甚馬隊小營盤一處軍塘一處郵差馬撥二處戈壁一路以此處之水爲最佳過客宜多多攜帶因上下站水皆苦鹹不堪入口且飲後有致疾之虞須慎防之燃料亦須在此多備

二十五日 早餐後與折君遊井泉井口結冰尺許厚水甚清因命僕取三大葫蘆懸於車轅備作下站飲料午後一時由猩猩峽開車行十里過一嶺嶺上有關帝廟建築

宏壯同折委下車入廟觀覽廟內有司香火之老道一人由哈密廳月發香火銀三兩令其守廟殿供關公像又懸供大鐵刀三柄紅布袍一襲官商之懸匾者甚多殿外有猩猩石老道妄言係天上降落之隕星奉之如神實則一尺許高之結晶石耳適過山即大危坡行走不易該老道即藉以斂錢謂石至神異過客如不虔誠祈禱必遇大風阻路而往來客商以行路艱難亦多信之免致中途危阻車夫之迷信尤甚竭力要求欲余焚香拜禱以免風災余因斥該老道此石明係結晶石何得妄謂天上隕星妖言惑衆即命僕人付老道十金將石抬置車上帶往新疆老道惶急萬狀再三哀懇謂無石即無香火道人之生計絕矣余根究此石之來源云實係得之後山當呈小晶石三方蓋後山出產此種晶石以人跡罕至知之者鮮老道遂得以售其欺耳余因告誡該老道以後勿再以妄語欺人遂與折君登車途中自思不覺失笑行五十里至小紅柳園時已六鐘半矣停車晚尖八時復行九十里夜三時半至沙泉子宿焉該處只官店一私店二今日在山峽中行三四十里又經大山一路

顛頓疲癆已極

二十六日 午後一時由沙泉子開車路尙平坦惟沿路之水惡劣不堪行四十里至一腰站土房三間有一道人招待又八十里晚十時至苦水該處之水飲之則病一路風沙甚大聞左文襄西征時曾有餉銀二百萬裝車數十輛解餉官兵數百人在此一帶被大風所吹渺無蹤影實駭聽聞若單人獨騎之失蹤者或被風吹出數百里之外者時有所聞沙漠中之旋風異常厲害經此者無不懷戒懼之心

二十七日 大風怒號飛沙眯日余與折君體均不適既苦飲料之艱難加以沿途之勞乏然不能休息只有勉強支持午後一時開車行八十里至腰站只有土房四間一僧人看守耳晚餐後十時起身又行六十里至鹽墩時已四鐘天色微明矣一夜未眠困乏益甚幸水尙可飲

二十八日 大風未息午後二時由鹽墩開車途中積沙厚尺許雖不顛頓然輪陷沙中行走不易驟馬數步一停喘息不已幸無長岡大嶺稍減艱難耳至長流水宿焉忽

見樹色青青多日不覩樹木乍見精神爲之一舒該處有人家二十餘戶多畜乳牛
莊後有菜畦余曾勸該處土人將泉源開大灌溉田地多種菜蔬據云泉即開大而
水量祇有如此此理不可解是日行七十里尙無大苦水味亦好

二十九日 早起觀長流水之清泉共三處水尙清冽有一土山上有關帝廟街後菜畦
一片街東一土圈畜雛牛甚夥飯後三時開車一路土地多旱葦及小樹株地非瘠
壤多可種植惜缺水且土人性惰以致地皆荒蕪可惜也行七十里九時半至黃蘆
岡宿焉此處約有人家十餘戶間有力田者是日路尙平穩水亦可飲

三十日 上午十時早餐後開車下午五時抵哈密城哈密廳劉李二監督李協臺及同
鄉商界領袖多人均迎候於接官廳遂下車周旋隨往北關八雜店街旅店休息沿
途見種田力農者甚多並見鄉村公立小學堂兩處校舍新建外表頗有可觀距城
十餘里樹木葱鬱（哈密產桃杏最著）附郭多菜園種植者多客籍聞直隸人頗多
晚接新疆學務公所科長金育才兄來函詢問同行眷屬共幾人以便代租房屋金

君均來廬暢談午間與折少蘭兄同至監督署赴劉華甫司馬之約同席有周協鎮劉君之幕友張君及劉君之令姪與幼公子喫家鄉飯頗適口飯後開留聲機暢談許久回廬已晚七時矣

初四日 早餐後劉華甫司馬來廬陪余與折少蘭兄往謁哈密親王遂同至回城見城垣修整城每面長約二里有護城河圍繞城內外道路平坦余等進北宮門繞至後花園下車閣者導入水榭旋哈王出見身材壯偉顏色和藹髮辮下垂粗通漢語自云字西屏現年五十二歲四歲時祖父因不附各回王叛亂致遭慘害國家矜憫忠誠故有世襲王位之命言時忠義之氣見於言表侍坐者有通譯官三人均有髮辮內中有在北京哈密館二十餘年者深悉北方人情風俗精通漢語余當詢以回部一切情形據云哈王轄境約四百餘里政府特准訓練回兵五百人服裝一如淮軍所著號褂式樣哈王所立法令極其簡單犯罪輕者鞭背或罰充苦工重者發南山地牢中監禁或一年或半年不等

外間傳言南山有蠶井內畜各種毒蟲犯重罪者即裸罪人之身推入井中任蟲咬斃確否待證

人民多富

庶生活優裕無賦稅惟每人月須應役三天爲王耕作領王籽種者收穫時按王七成民三成或四六成呈繳領王之牲畜畜牧者亦然每年除將原領之牲畜繳還外其孳生者與王平分原領之牲畜或有死亡則責領畜之民賠補貧苦之家王按年入糧畜提十分之一以賑恤之較諸我國冬賑粥廠之法尤爲簡而普及纏民性情和平操作勤苦無嗜好善居積赴俄羅斯土耳其兩國貿易者甚衆出產有牛馬羊皮毛及葡萄西瓜銀杏等物礦產煤質最優良油性大而無烟可以終日不滅銅質亦佳

哈密所製
銅盆最著 土城甚多纏民以之製肥皂價廉而適用距哈密十餘站地名吐魯番氣候溫暖如江南終年着夾衣產五穀棉花甚夥足供甘新兩省之用回王注意教育竭力興學設有忠愛漢文小學堂及簡易識字學塾各兩處以教育回民劉君問王令嫵曾歸寧否王答云小壻因病特偕小女來此處養疴蓋回王之壻亦南部某回部之王被本部監督需索太苛難於應付加以年輕識淺憂勞致疾成精神病醫治罔效當告以天津西醫有專療此症者可往一治回疆各部回王十九皆哈密

王之姻婭一切均惟哈密王之馬首是瞻回民之服制男皆西裝外罩圓領大花袍如日本之和服足着皮靴頭戴小花帽婦女衣飾靴帽與男子同髮分三股髮梢編辮下垂以五色花綢蒙頭罩面身着圓領大袍有紅綠花三色間有着紅綠背心者狀如戲劇所扮之觀音體貌粗蠢皙白清秀者甚少哈密王定制回漢不通婚媾不准婦女賣淫及賽會觀劇即偶爾因事出外亦須用面罩否則必嚴責該管頭人以皮鞭鞭之至其他部落之回王則以職位較卑不能懾服回衆婦女之賣淫者不能

制止

纏婦回語
曰秧歌子

回民無箱篋儲藏銀物多以羊皮包裹之余勸哈密王振興實業秋

間進京入貢時可選擇聰俊青年

小孩回語
曰巴郎子

十數人送入天津實習工廠分習各種

工藝以便歸來傳習深荷哈王贊許惟以飲食起居不便爲慮余允爲介紹天津民興報館社長劉伯年君醫藥研究會會長丁子良君（二君皆天津回教紳士）請爲招待哈王稱謝旋承哈王欸以香茗蓮子羹王又陪余等遊覽花園樓殿亭臺曲廊水榭略具規模路以石子砌成稍有花紋牆皆土築頗見質樸王復引至大殿設

筵款待捧箸進觴掃位安座待余等以上賓之禮優隆周至殿上陳設簡樸上懸西太后所賜大福字案上一木座之時鐘兩旁列粗磁花瓶一對如是而已席終辭別王送出余等再三辭謝不獲直至大門見門左有古樹一株不知何名高數丈粗約三四圍一本而九幹幹皆橫出以石柱擎之其狀夭矯盤屈遙望如九龍飛舞故回人咸呼之爲九龍樹亦千年古物也樹葉繁茂陰周二畝有餘惟遍覓樹根不得蓋年久深入土中矣據哈王云幼時曾聞其祖父言樹之四圍原有清渠繞護樹之中央嵌蓋禮拜寺一座建築極精爲王每日禮拜之處今不存矣遊覽既畢遂與哈王揖別登車復隨劉司馬至新修之小學堂參觀工程地勢甚寬敞教室凡五光線充足禮堂布置齊整其餘如延接庶務管理教員各室亦稱完備聞係併官立之第一第二兩小學及私塾三處而成此校合五處之學生共約八十餘名蓋閤城人口不多之故耳

哈密地多膏腴民勤耕作故農產甚富尤以水菓爲最距哈城五里有龍泉寺該

處富於水利故菓木彌望皆是附郭蔬園七十餘處皆直隸之河間獻縣兩處客民種植年產西瓜甚多味最甜美每歲入貢一次例于元日日進呈皇帝早膳後必進哈密西瓜西太后尤喜食至貢瓜辦法於七月間選瓜之最佳者在未摘之前即用大竹筒裝好俟十月間成熟即連同竹筒摘下固封派馬撥兼程馳送日夜不停務于臘月祀灶前趕到以備元日日帝后之進用瓜到北京入宮之花費甚大每屆三年則大貢一次除西瓜之外須精選奇特之駿馬十二匹每匹價值均在千金以上物色頗非易易正貢之外更有副貢即孝敬各親王各軍機大臣者惟慶親王處除貢品之外必須另備賞銀五千兩賄賂親貴或大臣銀封上皆書備賞二字蓋備賞賜他人之意再加宮內外種種花銷每貢一次所費不貲京中大臣取于外省之大吏各省大吏取給于地方官地方官廼竭民脂民膏以奉之官如是政如是欲國不亡得乎

初五日 午間偕折少蘭兄同赴周協鎮麗生之約係特由省城招來之燒烤庖人又招

一唱大鼓者以侑酒同席者有大稅局委員黃仲江明府哈密廳監督李蔭南司馬

劉華甫司馬湖南楊子仰大令安徽方培之大令甘肅閻贊廷大令

楊方閻三君皆因辦學不力停委三

年閻君落落寡合不怨不尤楊方二君則憤慨見於詞色楊君更反對一切新政其思想可知年已周甲宦橐充盈而歸亦云幸矣

觥籌交錯賓主盡歡周君爲駐

新宿將席間談及曾追剿白彥虎直至天山之南同治年間剿豫魯捻匪頗著功績

回匪之亂奉調至陝甘剿辦力殲巨寇屢克堅城曾任新疆全軍翼長新軍協統堪

稱新省之長城爲人智勇兼優崇尚仁義在迪化數十年弭地方之隱患矯社會之

頽風排難解紛數語折服屢以年老乞休上峯均竭力慰留現到哈密協鎮本任兼

統馬步三營駐哈年餘導民耕種提倡稻田講求水利發展森林舉凡利民之事無

不盡力經營因之人民愛戴到處口碑惜新撫無知人之明不能重用耳回廬後晚

發肅州王雲陞甘州張子坡蘭州侯崑源雲倬樵天津周小林孫子文諸君函又桐

君妻一函

初六日 午間與折少蘭兄應黃仲江明府之招席間有鯽魚鮮美異常西北一帶珍貴

之品也

甘新魚蝦罕見

同席者仍昨日原座一人不缺晚發涼州王振山天津李子久齊隲

齋諸君及南京五哥九弟各一函

初七日 劉華甫司馬在厲備家鄉便飯相約午間與折少蘭兄同往周麗老相陪席間

談及去年七月六日省垣之變麗老異常憤慨並云新省去都城萬里孤懸沙漠之

外省內倉廩空虛城中素無糧店皆仰給城外水磨之米麪城守雖有馬步砲兵四

營然素少訓練新撫聯帥官印聯興京旗人又復胸無點墨據云聯撫台只識十六字姓名月日及數目而已旗籍大員每多如此並有放學差者

一旦不幸有警不出三日即須潰散余麗老自稱因受新人物排擠力請回哈協本任以

故省垣之事幸未躬與聞當時變起倉卒聯帥頓足痛哭束手無策而藩臬各大憲

皆閉門自守莫贊一詞官兵亦作壁上觀若無其事一任匪徒倡亂者為遊勇王雲陸陝西人係哥老會之首領

劫獄開城勾引幫匪大肆搶掠被害者達四五百家尤以津商為最迪化之精華殆

盡事後密不奏報嚴查郵電以防透漏消息時京報記者彭君翼仲亦遣戍在新日

覩此種情形激于義憤密懇新疆財政監理官梁君素文以密碼電報密呈度支部

尙書載澤政府始得知其概電新查問聯帥不得已密派心腹疏通津商賠償損失十

四萬兩而以傳聞失實四字蒙蔽政府了之新省之政治軍事腐敗如是而強俄接境一日苟有邊釁前途不堪設想矣周麗老言畢慨嘆至再雖忠臣之慮遠謀深而當局者視同兒戲真令人哭笑不得晚發天津民輿報劉伯年丁子良二君函爲介紹纏回青年至津學習工藝招待起居事又發天津商會總董王君劭廉一函附桐君妻函托轉交又致天津王勵齋張鼎臣潘雲超三君公函

初八日 早偕折少蘭兄至距哈城五里之龍泉寺考察水利見泉水清冽樹木葱蘢是日適值賽會爲哈密第一盛舉商家值年以董其事文武官員皆往祀神獻劇遊屍如雲頗極一時之盛然遍觀無一小教纏民之婦女舉此一端足見哈王政令之嚴

明纏民之守法矣

已經同化之回民回漢人民均稱之爲小教

周麗老亦在會場約到官廳觀劇其聲調類

似山西梆子稍坐即告辭回寓命僕人料理行裝哈王柬請次日觀劇並設筵一叙余以已在哈密耽延九日恐省垣諸至友及諸同鄉盼望因托劉華甫司馬代爲婉謝決定次日啓行旋周麗老率其公子秉鈞世兄同來送行余贈以新小說數種並

勸其多讀新書劉華甫司馬亦來送行餽鴨子鴨蛋及白米一斗醃肉四塊程儀四

十元李蔭南司馬及黃仲江明府均差帖送行

初九日 早九時早餐黃仲江明府來送行談十餘分鐘揖別登車仍進西城出南城繞

道回城留帖與哈王辭行行七十里下午五時至頭堡店宿焉該處住戶祇一、二家

有水有菓園

由哈密城北出四站爲八里坤官馬廠該處產馬多而且良時有千里名駒每匹

價值均在千金以上

普通馬每匹不過八九兩懸殊如此

每次貢品多取材于此南出八站爲吐魯番

回部產五穀棉花果品最著

昔年林文忠公則徐因焚燒香港英人烟土獲罪發遣新疆被赦後命爲水利大臣在西北一帶力興水利提倡農林由是菓木繁

殖惟棗樹與山芋不活曾有天津楊柳青人某姓將西北所無之各種菓穀等秧苗用花 功夫竭盡心力將秧苗運出方抵甘肅即因天氣寒冷秧苗盡萎其人懷喪萬狀憤不欲生由此可見西

北種植之難自林文忠公竭力提倡以來至今獲利甚大 再南爲伊犁喀什和闐等處至回民

非但足供甘新兩省之需並且銷行俄國人民至今感頌 之服裝經詳細考察始知男女皆着黑染羊皮之高襪黑牛皮鞋遠望儼若皮靴

價值每雙五六兩至二三十兩不等內襯織絨花襪頭戴四角小帽中心繡花周

圍納花身穿大袍腰間束一洋絨花帶善騎快馬雖十二三歲之孩童亦能之蓋

地產佳馬習以爲常故也纏回婦女無論老少貧富出必以綢巾罩面歸化回民亦遵哈王之命

宗教力之偉大可羨可佩回城有渠水圍護水清而甘樹木森森一望無際城後有王爺台即回王陵墓

以碧琉璃瓦造成四五丈高之寶頂以湖色花琉璃磚圍之下砌妃色琉璃磚回

王墓之四周皆王族之墳墓其形狀不一多方式者上有方形或圓形之十樑爲

頂前有土門有雕成花木窗者有兩面階級者聞地位尊崇之人則墳上蓋一大

圓屋屋頂作尖圓形四面有門與內地回民墳墓迥不相同不知何故

初十日 早九時由頭堡店開車行二十里至二堡尖該處有住戶三四十家纏回多種

菓木因有水利故亦有耕種田地者三時半復進七十里至三堡宿焉該地有人家

二三十戶牧羊者三家每家畜羊皆過百頭漢民居村裏纏回居村外菓樹田園皆

仗水泉之利頗爲繁茂（甘新兩省以地勢太高不易得水而終年雨水又少人民

灌溉田地以及飲料無泉水之處則惟恃山中之雪水而已）

十一日 早十時半由三堡開車有微風行二十里風漸大又逆風行十餘里忽狂飈驟

發愈吹愈大愈大愈猛聲如獅吼又如萬馬奔騰海潮怒湧天地晦冥昏暗如夜飛

石揚沙似雨似雹

甘新兩省多山山石被水冲成石片或隨水流出或被風飛揚日久年深地面厚積石片數尺是以寸草不生一遇大風石片隨風飛舞小者如豆如棗大者如卵如拳

打擊車棚聲如雨雹

車既不能行又無避處只有立定聽之車被風吹搖動不已岌岌乎有隨風

飄蕩及傾倒之危幸車夫均有經驗預用粗如臂膊之皮繩將三車牢繫一處始免

翻倒牲畜均以布蒙首閉目低頭不敢稍動車夫則着老羊皮襖袴蒙頭臥轅下余

坐車中似浸於冷水中通體如冰心中忐忑然思既已遭遇此厄無術救援正如待

決之囚惟有聽命由天而已車被風吹旋轉不定車門忽被吹落沙石直撲車內風

吹面上痛如刀削寒冷刺骨急與姬人按裝車門風勁手顫心愈急急裝不上大呼

僕人久無應者蓋為風聲所蔽耳不得已遂與姬人用小衣箱將車門倚住再令姬

人圍一皮斗篷坐于箱上姬人被寒風所逼既冷日懼大哭因又以棉被裹之余亦

遍體寒戰手足皆僵亦以棉被自裹然無濟於事閉目冥心待死而已歷二時之久

風勢略小而天地昏暗如故幸一路有電桿可以藉作指南因催促車夫冒險就道行至九時餘始抵三道嶺該處有旅店四五家小教回民數家纏回二家小菜園及菓園各一處余等擇一旅店宿焉店主一見歡聲道喜云遇此妖風而平安無事大人真有大福氣蓋遇此妖風者十九難免于厄余詢以發風之地據云三道嶺瞭墩一碗泉三站均時有妖風而發風之處大約在十三間房距此百餘里時有一甘省之某姓在側其人業醫往來新省已數十年據伊云妖風實起于十三間房該處距瞭墩九十里距三道嶺及一碗泉均百餘里地勢爲三角形十三間房爲當年往烏魯木齊即新省之舊名之舊大道近稱北站後因屢屢失事同治年間左文襄餉車失事即在十三間房附近遂于光緒六年改行三道嶺一帶是爲新道又稱中路故風勢較小而在往十三間房之道中立一大石碑警戒行人紀文遠公所著之閱微草堂筆記載有妖風數節初以爲文人虛構縱有大風未必如所記之甚今余親身經歷方知古人所言者非但信而有徵且當時實況且有甚于筆記之所載者余之得免於厄亦云大幸矣是日該旅店中失雞三隻被大風捲入空際無影無蹤幸驟馬牲畜均預先繫入屋內否則亦恐不免店中住有纏民二十人係哈王派來迎候卸

任之鎮迪兼臬憲癸廉訪者攜有草料麪及羊隻等物據云哈王應供應十餘站每站皆如此辦差送舊迎新年必若干次真難乎其爲藩王矣

十二日 下午五時餘由三道嶺起身一路石徑崎嶇頗不易行黎明始至瞭墩一夜顛頓頭暈眼花到旅店後即下車安睡直至次日十時始興該處有旅店三家駐紮馬隊一哨釐卡一處住戶數家菜園樹木略有少許

十三日 午十二時由瞭墩開車均在山巔上行一路經過峯巒無數幸路尙平穩此處

距帕米爾高原崑崙及南路諸山相近步行走高原故高山舖在脚下

聞過山即巴里坤

遍山積雪尙未融化冷氣襲人寒風刺骨行八十里八時至一碗泉只官店一處因止宿焉入店見滿地積水無下足處皆前日大風將山上積雪吹來融化所致兩廂以亂石砌牆屋中亦積水二三寸上房三間無門窗以碎石爲炕地上亦有積水鋪以馬糞二三寸厚雖能涉足而濕臭之氣觸鼻欲嘔不得已即憩于此僕人以毛毯堵塞門窗藉避寒風然空氣一不流通惡臭之氣更甚坐久鼻爲之塞胸膈之氣上

逆更兼冷風徹骨遍身戰栗燃料不可得禦寒無策只有忍受苦痛萬狀非言可喻
真可謂人間地獄矣看守官店者一人四川有馬撥一處約三五人該處泉水甚少
祇能供給三四十人若多汲則泉竭矣故以一碗名之確稱其實山皆黑石地皆石
沙以故寸草不生據店主云若用土修房須往二十里以外掘取

十四日 早九時由一碗泉起身行六十里至鼓輪泉尖該處爲鄯善縣轄境在山峽中
只官店一處馬撥一處是日因接大差將官店備作行台過路客商均無安頓處余
等亦祇好在店門外休息略進飲食下午四時仍起身前進山谷中紆迴盤曲形
若羊腸兩旁層巒疊嶂怪石嵯峨幸路尙平坦不甚顛頓耳行二十餘里始出谷口
下一大斜坡約四十里至晚十時始抵七角井子宿焉因多行六十里人困馬乏該
處有旅店三四家馬隊一哨飲水既好燃料亦多四圍多梧桐樹極繁茂

十五日 午十二時由七角井子起身行十餘里有岔道碑左赴奇台迪化右順電桿赴
梧桐窩及吐魯番又行十餘里忽見山巒疊起奇峯聳峭儼如圖畫精神爲之一快

入一山谷谷中甚狹路若羊腸僅容一車左右懸崖峭壁岩下石塊或大或小有高厚丈餘者谷長七十里晚十時始出谷口抵頭水溝只官店一家馬撥一處店房爲榮廉訪之家眷住滿不能再容他客另有小店一家祇殘破房屋三間已爲其他旅客住滿屋小人多臭氣薰人欲嘔無可如何惟有仍坐車上取自帶籬鍋煮飯充飢夜間即在車中歇宿夜風甚大寒冷已極

十六日 因夜間寒極不能成寐黎明即開車登程倦極轉能熟睡上山時被車搖醒閱時計已六鐘矣一路經山溝山坡甚多無大險阻故車行竟日能于安臥晚十時至大石頭宿于官店另有私店三家兵營一處馬撥廟宇住戶各一處水味略鹹尙可

飲

十七日 九時餘由大石頭開車所經皆土地甚鮮沙石惜缺水不能墾植耳途中有官設腰站數處亦以無水荒廢

沙漠途中多蒙古包類似土窰爲躲避妖風之所用意甚善

近山多纏回及韃子居住以

牧爲生路見初生之小橐駝

一二三年者

數十成羣在無邊沙漠中排列成行其風景與

畫圖無異惜無攝影機不能攝取當時景致深爲遺憾據土人云小橐駝須長養四年方可使用晚十時過大坡二道始至三角泉郵舍該處有官店一處房屋多而寬大私店小店各一家馬隊一哨坡上有一廟

十八日 九時餘由三角泉起行一路大坡多而不險距天山支脈頗近故老沙原行五十里至腰站下車稍息略進茶點遙望雪山漸遠六時至木壘河宿焉該處有店舖

及住戶約百餘家自禁烟以後生意日見減色舖戶多關閉者

新兩省人民因氣候寒冷種麥獲利有限惟種罌粟

粟利益較豐一年食用物品皆賒欠於津陝兩省之商號名曰放帳俟花漿收穫歸還積欠行之有年已成習慣今一旦嚴禁種烟則人民生計完全斷絕問題極大當局者應籌善並應不可忽視

有河

一道寬約丈餘由天山支脈流出至木壘河分支流四五處入四鄉澆灌田園又有馬隊一營駐紮街西有奇台縣官立第三小學堂有學生數十人是日業已下課未能參觀教習楊君西安人校內一切設備粗具規模寒外有此殊不多觀時有郭君海臣亦西安人爲馬隊中哨官該校爲郭君前署木壘守備時所手創籌經費招學生頗費經營始能成立晚間楊郭二君來拜談甚久郭君人極熱心明白大體武

職中不可多得之人材也

十九日 早起買熊掌兩對

熊掌為木壘河十產其南山中並產野驃馬駱駝等物

早餐後十一時自木壘河開車行五

十里皆在山溝中兩面土山間有墾熟之田出山口即腰站茶尖又行四十里六時

至奇台縣東關有街一道住戶商店約百餘家狀況蕭條城內住戶聞只二三十家

因縣官遷駐古城子故也

古城子為入新疆第一商埠故縣官遷駐於此

二十日 十時由老奇台開車行四十里尖站稍息又行五十里至古城子廐東大街旅

店奇台縣鄭遂生明府

湖北人

來拜交到金育才兄函暢談許久方去晚飯後同鄉文

豐泰京貨號劉君錦洲來談甚久該處為通商大埠商賈雲集尤以直省商人為最

優義園會館俱備山陝次之

二十一日 早餐後拜同鄉商號文豐泰京貨舖張君潤田兼詢有無家信

張君老於商務識見高明為該

埠出色人才

成利順京貨號張君蘭軒

余與蘭軒兄為舊雨異地相逢尤增快慰

瑞牲祥京貨號劉君錦波武清

德興隆燒鍋劉君浚川諸君皆該地商界之領袖晤談極暢並蒙竭誠歡迎情見乎

詞令人增感又至奇台官立第一初等小學堂參觀校舍係新建設備尙稱完全計分甲乙丙丁四班學生九十餘人管理兼教員共四人除天津人楊敏卿君外其餘三人未得見時值學生溫課未知上課之精神如何然只就其形式而論邊省已不可多得校內附設簡易學塾及纏民小學各一處見纏民學生上課者約八九人皆讀抄本字課教習係一老纏民生員通漢文算學回廬後知奇台縣右堂鄒君桂森及奇台縣巡警局王君恩聘來訪未及接待晚赴奇台縣鄭大令之招同席有高等小學堂管理員劉君小藜巡警局王君雲台廣西人飯後歸廬已八時同鄉張潤田劉錦波張蘭軒諸君來廬暢談並挽留多住一二日因衆同鄉擬於二十三日下午開會歡迎情不可却允之今日在劉君錦波處得見伊犁白話報登載北京統一黨成立仍推孫伯蘭君任幹事長襟懷爲之一暢

二十二日 早餐後同折少蘭兄回拜巡警總局王君右堂鄒君後即參觀奇台縣自治總局局內附設自治研究所學員十餘人所長高君亨卿庶務張君蘭坡皆津人講

員王君奉勛本縣人原籍爲直隸高陽門前又懸議參心會豎牌惟房屋祇三間只可敷衍辦事不堪作議場也又至兩等小學堂參觀堂長兼高等教員爲劉君小藜初等教員羅姓湖南人內又附設實業小學教員爲李君桂圃時各教員率學生六十餘人開歡迎會請余演說余遠戍塞外受此歡迎殊出意料之外當先答謝歡迎之厚意復演說列強侵凌我國之政策及各國之所以強盛皆教育發達之效果我國圖強之要務必先求教育普及將來學生之責任甚大應努力求學以救國圖強爲責職等語旋赴同鄉成利順張蘭軒及瑞牲祥劉錦波兩君之約喫家鄉餃子同席有劉捷三李久安韓瑞堂諸同鄉飯後由張劉二君陪至德泰成棧內拜訪同鄉商號同盛和祥圃君德泰成張潤生君（即文豐泰張潤田君之弟）興泰和郭雨村君文義厚曹仲三君義成厚宋厚甫君德潤源李潤滋君德泰裕喬如山君義泰恒楊春圃君怡和永韓瑞堂君玉興隆王顯周君振豐恒高霞軒君均承熱烈歡迎余私衷慶慰晚十時始同折少蘭兄歸廬

二十三日 早老友張蘭軒兄過訪即共早餐飯後復由張君陪同拜訪同鄉義春當趙

君

公出未晤

德泰昌劉捷三君

趙劉二君皆楊柳青人

品隆當張蘭坡君

天津關上人

及榮興和京貨莊

路經蘭軒兄處即入內小憩旋至德泰成棧赴同鄉之歡迎會凡同鄉商號之名望較崇資本較厚者約二十餘家其領袖均到會歡迎余一一接談得知率皆幼年失學遠出貿易白手成家經驗宏富蓋已吃盡辛苦方成就目前事業殊不易也余深爲佩仰當告以家鄉舉辦自治之情形及已得之成績又實業發達狀況入席後即演說大意爲各國商戰已達極點我國工商業不能振興勢必爲各國銷貨之場所每年漏卮無限利權外溢良足痛惜且國本因茲日弱益足啓列強覬覦之心目前俄商麇集邊陲俄之纏民到處自由貿易與我國纏民無異昔年陸白彥虎叛亂投降俄國者俄政府縱其侵我權利所來之貨皆不納稅哈密古城兩處極多官吏任其雜居隨便貿易不加干涉將來根深蒂固爲患益大切須注意我國商人應從速振奮精神聯合哈古兩處各幫商號成立商會並由迪化各商號組立總商會一方面協助關外各地商會會務之進行一方面與關內各地商會互相聯絡講求研討以期日漸發達如是日新又新方能與列強爭

衡挽救危局再關外士著稀少風氣閉塞人民素不讀書方今庶政維新各同鄉久於茲土即無異第二故鄉對於地方警務學務等務須盡力維持並須講求自治凡屬公民選舉權萬勿輕易放棄等語衆同鄉聞之莫不欣然色喜精神倍振當由主席張潤田君致詞答謝後即開樽暢飲共列五席觥籌交錯歡樂非常直至夜晚方始終席余當向各同鄉一一辭行公議遠送余再三辭謝回廬後兩等學堂劉小藜君李桂芬君及羅君均來送行警局李雲台君陪同縣署刑席李君山西人忘其名字來訪又大局總辦周君自治局同鄉張蘭坡君高雲卿君亦同時過談以朋滿座談笑盡歡忽狂風驟起來賓始各興辭二更後張蘭軒兄又陪同商界董事梁君敬齋代表陝幫來訪堅留一日以備邀集陝省同鄉開會歡迎余以急於就道婉言謝之是夜大雨達旦

二十四日 晨起發甯津兩廬家書及迪化學務公所金君育才函旋陝幫會首復來堅邀一聚余以昨夜大雨道路不便行走更以陝幫來意至殷不便過拂因勉從所請

九時拜郵政局同鄉李潤芝君

武清人

後卽同折少蘭兄赴陝幫歡迎會之約主席爲

陝幫會首梁敬齋君又有陝商領袖魯明春薛作周曹文卿馬三榮諸君陪席者有直隸幫會首張蘭軒君席間演說與昨日在直隸幫同鄉歡迎會中所說者大意畧同過午始散晚間至文豐泰張潤田君處晚餐同席者有張蘭軒劉錦波李潤之諸君回寓後張蘭軒兄送茶葉點心香腸張君潤田送雞子及薰雞梁君敬齋送點心諸同鄉又擬公送川資數百金以壯行色當托張李二君代爲辭謝不允後經余說明到迪化後擬創辦一報提倡西北實業至時再請各鄉親大力幫助現無用錢之處姑且留備將來再四陳說始得諸同鄉之應允萬里外蒙諸同鄉熱忱愛護實令人銘感難忘

人銘感難忘

二十五日 晨起陝幫代表梁君敬齋直幫代表張君潤田及張蘭軒劉錦波劉久安宋厚齋諸君來云兩幫商界同人在西關外特設茶座送行余力辭不獲卽同蘭軒至號中早餐十時起身見滿街各商號結彩懸燈車馬終繹至西關下車入茶座當由

張潤田梁敬齋兩君代表奉酒三盃祝余早日赦回好爲同胞努力余答謝並祝該處商會早日成立言畢揖別諸同鄉均依依不捨遂登車長行四十五里至腰站茶尖又四十五里至濟木薩東關旅舍宿焉該處屬孚遠縣余在旅舍略事休息卽入城詢查見簡易識字學堂一處自治局內附設董事會研究所因入內參觀由所長劉君原湖南人已入新籍招待祇上房三間甚狹隘東裡間設兩棹四凳正房外又有破屋兩間院中逼窄毫無陳設據云學員祇八九人不甚發達城內尙有小學簡易各一處余以大晚不及參觀街市甚蕭條漢回雜處生計平常

二十六日 九時由孚遠縣起程行四十里中午一時至雙岔河腰站稍息鄉民見余撫髮辮以爲奇怪聚觀者甚多余詢問鄉民之生計與當地之生產年老者始漸敢親近轉詢余洋學堂將來如何有無受害因伊家有一孫被官府迫入洋學堂舉家惶急日夜煩惱余當爲詳細說明入學堂之利益與將來之出身羣始恍然皆大歡喜風氣不開無恠其然惜無人爲之演說以開通民智耳尖後又行三十里一路林木

森森至三台甫下午三時入旅舍稍憩即同折少蘭兄至街市觀覽該處雖無大商號氣象尙覺繁盛有武清人所設之京貨舖及當典各一家

二十七日 十時半開車行四十五里至腰站有小店二家店主皆陝人停車小憩略進茶點又行四十五里至淄泥泉宿焉該處回漢雜居約百十餘戶有公立小學一處學生十七人校舍正在起造不甚合法教習某君忘其姓名鎮西廳人師範畢業人尙明白據云到校尙未久前任教習係一老學究乏新學知識故學生無甚進步且無學董事事須請命縣署尤覺掣肘每逾十日或八日須至縣署帳房領粉筆數枝因此小事往返數十里真奇聞也

二十八日 早八時半開車行五十里至腰站茶尖又二十里至九龍街鎮居民祇百餘戶有小學一處又行二十里至阜康縣宿焉由魏蓋臣明府代備行館送酒筵一席招待甚殷今日一路所經樹木茂密一望無際惜土人不講林業因之多不成材只可作爲燃料水利亦好地多肥沃而墾種無人任其荒廢殊爲可惜西門內有公立

小學一處因就道匆匆未獲參觀

二十九日 早八時起程行四十餘里午一時至腰站茶尖適台車到站

台車又名跑車仿自俄人由省垣至

古城計程七百餘里一日半到達
由江蘇蕭縣人李君少岩創辦

遇同鄉賀君現充阜康縣記席告余在省時聞學務公所

總務科長金君育才與諸同鄉言知余即將到省正積極籌備歡迎余聞之欣慰異常恨不立時到省與諸同鄉晤聚又行五十里約八時至古牧地路多岡阜上下坡人極勞苦此處距迪化名爲四十里實祇二十四五里耳余因屬車夫連夜趕行進省允多賞酒資車夫云頭牯魯豫陝甘呼牛馬之通稱太累則生病明日坐尖後方能登程余不得已覓旅店宿焉據店主云凡進省客商經過戈壁長途勞頓至此皆暫住二日略事休息俾精神恢復然後進省此說亦甚有理然余盼望早到之心甚切雖鞍馬疲勞亦置之度外矣

五月初一日 余因盼望到省與諸同鄉聚首喜而不寐黎明即起而僕從車夫等因一路勞苦疲乏已極均酣睡未醒鴉鵲無聲余亦不欲驚動從人命姬人小梅爲余作

早點直候至九時僕役厨司始起料理行裝十一時午餐飯後催促車夫開車一路

平坦午後二時即入迪化東門卸裝于路北之大店內台車一名跑車總站即附設于此

台車之創辦者為李君少岩江蘇蕭縣人曾充直隸滄州樂字營馬隊管帶與從叔

小帆公相識嗣升任廣西都司因事被議遣戍新疆人極慷慨好友頗有才幹已受

金育才兄之托懸燈結彩掃榻歡迎余下車稍憩即飭价持片至育才兄處報到育

才兄即同省視學周君警言青鎮人來厲握手慰勞歡喜無量育才兄云前年弟來新

時兄為弟餞行勉弟到新後要造立一番事業不想兄也為新疆造立大事業來了

言罷均拊掌大笑

金君育才為天津西沽大學優等畢業生不但科學造詣精深漢文尤有根柢並精於書法楊柳青鍾子丹太史初簡新疆提學使蒞省初設是官杜公因求學部嚴

範孫侍郎保荐人才以資佐理嚴公即以金君荐謂其才長心細可為臂助金君行時余曾在余與嚴公合辦之酬俗書報館內為之餞行勉以到新作一番事業故金君一見重提舊事云下午四時

迪化府張太尊來拜並送燕席一筵極表歡迎寒暄之後余即請示管束之法張太

尊答云到了迪化即算完事見過大帥靜候派差別無話說余復詢以聯帥業已離

任新撫憲尚未到新

時巡撫聯興與藩司王樹楠互相計參均奉旨革職新任巡撫為袁大化尚未履新應當如何進行張太尊云不

必忙稍爲休息數日見見臬憲再說復暢談許久始別育才兄與周視學亦興辭謂
尙有爲余張羅之事余當握手致謝楊柳青商幫八大家領袖楊紹周周玉封二君
來拜親熱異常宛如舊識無絲毫客氣並云七哥到此如同到家一般一切用度不
必顧慮此區區者諸同鄉足能供給又問廬所已否商定或住育才兄公館或另覓
公館大家候信遵辦尋覓房屋不難也余萬里孤身羈縻畢域迺蒙諸同鄉如此愛
護雲天高誼感列難忘同時李少岩君來拜人極忼爽一見如故入座與楊周二君
一同暢談異常快慰新任袁中丞之幕友王君箴三人直隸潘君戟三人江蘇朱君少吳
安徽亦來拜訪三君皆日本留學生富於新知識先余二日到迪化晤談有頃知皆有志之士針芥相投傾心恨晚
楊周李三君恐余客多勞神即先告別余因張太尊送來酒席即留王潘諸君晚餐
復將行裝中所携之酒尙餘啤酒四瓶香檳酒一瓶取出款客暢飲盡歡直談至十
時餘始各告別余以盡日應酬談話太多頗覺疲憊客散後余亦就寢

補案 新省所售之外國酒極貴啤酒每瓶銀二兩香檳酒大瓶者每瓶十四兩

交通不便洋貨之價值奇昂余在新日久新人云請溫七爺吃飯請得起請溫七爺喝酒請不起成爲俗諺蓋每一讌集所用洋酒非三四十金不辦故也當時余迷信歐風着西裝吃西餐飲洋酒住洋房以爲要成維新人物非事事皆洋不可而其實對於科學精髓毫未研求一味染習皮毛隨在鼓吹無異爲洋貨作義務之推銷迄于今日業已風靡全國漏卮日鉅習氣日深更且變本加厲爲害益烈是皆余當年提倡之罪清夜捫心如芒刺之在背今余年已垂暮無以自贖且洋貨業已暢銷用者已成習慣無法阻撓惟有忠告國人迅速講求科學振興工業仿效製造以應需求庶幾亡羊補牢挽回萬一否則前途之危不堪設想矣

初二日 晨首縣張明府來拜送翅席一棹其人頗有幹才略談辭去賓朋之來歡迎者踵趾相接盡日酬答疲勞殊甚下午育才兄來留共晚餐育才兄告余已在其公館內收拾房屋數間備余與姬人居住余當向道謝擬於午節後搬入育才兄以旅店不便養息諄促即遷遂決定初四日搬入新居

初三日 早點後往謁臬憲

楊增新

手版稱呼頗費躊躇後思及本犯二字甚覺新鮮且不

卑不抗似較得體遂決定用之楊廉訪接見後顏色謙和云正與杜學使商量擬訂日歡迎余當辭謝不萬敢當隨請示管束楊廉訪笑云既已到此即無事了只要不出城隨便可以居住昨聞已商定借寓金科長公館老友同居當不寂寞我們亦可常常領教後談及彭翼仲云雖係奉旨監禁但彭君初到時因有家眷特在首府衙署大門內另蓋房屋一所使其居住後由金科長代爲關說現已准其自由居住矣又詢余一路起居甚詳遂興辭回寓余在臬署見發遣之各官吏無不翎頂輝煌照常上衙門當差事儼如候補人員惟余與彭翼仲二人爲政治犯與一班官僚薰蕕不同器難爲伍耳


初四日 清晨即起姬人尤爲高興早已梳掠整齊準備入新居矣早點後解委折少蘭兄與余告別彼此依依大有不忍分離之概少蘭兄云極願咨調來新省當差藉可常常聚首余尤爲竭力設法期償彼此之素願旋至育才兄公館視察新居育才兄

爲余收拾臥房書室各一間房屋寬敞光線充足房外迴廊環繞院中花木扶疎又有清渠一道小橋通焉窗對博克達山山頭終年積雪每風雨晦明雲影山光時時變幻快人胸臆可以修養可以讀書雖終老于此亦云幸矣良朋愛我感何可言遂由育才兄飭价將姬人接來並布置行李從此閉戶埋頭讀書養氣靜以待時而已

書後

國無法不立余憤滿廷專制我大漢民族日趨衰落糾合同志爲請願國會定憲法之運動風起雲湧全國響應俟見西后那拉氏絕無誠意一變宗旨爲排滿革命由秘密漸至公開運動大遭滿漢官僚仇視三省民衆代表多人至津求援學界開大會歡迎余旋被舉爲全國學生會正會長通電全國學校罷課示威運動滿廷執政奕劻受意直督陳夔龍奏參余鼓惑學生謀爲不軌從輕發往新疆充軍嚴加管束余得作崑崙之大旅行雖喫盡痛苦然藉機增長學識甚多惜無多大供獻於同胞未免愧慙耳

支英濫世霖



中華民國陸培庚年何月拾捌日

贈

國立中央圖書館



0474798



782.884
8357

舊籍

